



丁卯冬夜閣 巳卯二月廿日朱季點助

列傳第五十四

南史六十四



江子一

胡僧祐

徐文盛

陰子春

子鏗

杜顛

弟岸 兄子龍

幼安

王琳

張彪

江子一字元亮濟陽考城人晉散騎常侍統之七世孫也
父法成奉朝請子一少慷慨有大志家貧以孝聞苦侍養
多闕因終身蔬食任梁起家為王國侍郎奉朝請上書言
事為當軸所排乃拜表求入北為刺客武帝異之又啓求
觀書秘閣武帝許之有敕直華林省其姑夫左衛將軍朱

異權要當朝休下之日賓客輻湊異不爲物議所歸欲引
子一爲助子一未嘗造門其高潔如此爲遂昌曲阿今皆
著美績後爲南津校尉弟子四歷尚書金部郎大同初遷
右丞兄弟性並剛烈子四自右丞上封極言得失武帝甚
善之詔口屋漏在上知之在下其令尚書詳擇施於時政
左戶郎沈炯少府丞顧瑛嘗奏事不允帝厲色呵責之子
四乃趨前代炯等對對甚激切帝怒呵縛之子四乃據地
不受帝怒亦歇乃釋之猶坐免職及侯景攻陷歷陽自橫
江將度子一帥舟師千餘人於下流欲邀之其副薑桃生
走子一乃退還南洲收餘衆步赴建鄴見於文德殿帝怒

之具以事對且曰臣以身許國常恐不得其死今日之事
何所復惜不死闕前終死闕後耳及城被圍開承明門出
戰子一及弟尚書左丞子四東宮直殿主帥子五並力戰
直前賊坐甲不起子一引稍撞之賊縱突騎衆並縮子一
刺其騎騎倒稍折賊解其肩時年六十二弟曰與兄俱出
何面獨旋乃免胄赴敵子四稍洞胷死子五傷脰還至漸
一勸而絕賊義子一之勇歸之面如生詔贈子一給筆黃
門侍郎子四中書侍郎子五散騎侍郎侯景平元帝又追
贈子一侍中謚義子子四黃門侍郎謚毅子子五中書侍
郎謚烈子子一續黃圖及班固九品并辭賦文章數十篇

行於世

胡僧祐字願果南陽冠軍人也少勇決有武幹仕魏位銀青光祿大夫以大通三年避爾朱氏之難歸梁頻上封事武帝器之拜文德主帥歸使戍項城魏剋項城因入北中大通元年陳慶之送魏北海王元顥入洛陽僧祐又歸梁除南天水天門二郡太守有善政性好讀書愛緝綴然文辭鄙野多被嘲諷而自謂實工於伐彌甚晚事梁元帝侯景之亂西沮蠻反元帝令僧祐討之使盡誅其渠帥僧祐諫解旨下獄大寶二年景圍王僧辯於巴陵元帝乃引僧祐於獄拜為假節武猛將軍封新市縣侯令援僧辯將發

泣下謂其子曰汝可開朱白二門吾不捷則死否則由朱白則由白也元帝聞而壯之前至赤沙亭會陸法和至乃與并軍大敗景將任約軍禽約送江陵侯景聞之遂遁後拜領軍將軍厚自封植以所加鼓吹恒置齋中對之自娛人曰此是羽儀公名望隆重不宜若此谷曰我性愛之恒須見耳或出游亦以自隨人士笑之承聖二年為車騎將軍開府儀同三司及魏軍至以僧祐為都督城東諸軍事俄中流矢卒城遂潰

徐文盛字道茂彭城人也家本魏將父慶之梁天監初自北歸南未至道卒文盛仍統其衆稍立功績大同末為寧

南史列傳五十四
州刺史州在僻遠群蠻劫竊相尋前後刺史莫能制文盛
推心撫慰夷人感之風俗遂改太清二年聞國難乃召募
得數萬人來赴元帝以爲秦州刺史加都督授以東討之
略東下至武昌遇侯景將任約遂與相持元帝又命護軍
將軍尹悅平東將軍杜幼安巴州刺史王綯等會之並受
文盛節度大敗約於貝磯約退保西陽文盛進據蘆洲又
與相持景聞之率大衆西上援約至西陽諸將咸曰景水軍
輕進又甚飢疲擊之心大捷文盛不許之盛妻石氏先在
建鄴至是景載以還之文盛深德景遂密通信使都無戰
心衆咸憤怨杜幼安宋邁等乃率所領獨進大破景獲其

舟艦以歸會景密遣騎間道襲陷郢州軍中懼遂大潰文
盛奔還荊州元帝仍以爲城北面大都督又聚斂賦汙甚
多元帝大怒下令數其十罪除其官爵之盛私懷怨望帝
聞之乃以下獄時任約被禽與文盛同禁文盛謂約曰何
不早降令我至此約曰門外不見卿馬跡使我何處得降
文盛無以荅遂死獄中

陰子春字幼文武威姑臧人也晉義熙末曾祖龍襲隨定武
帝南遷至南平因家焉父智伯與梁武帝鄰居少相善嘗
入帝卧内見有異光成五色因握帝手曰公後必大貴非
人臣也天下方亂安蒼生者其在君子帝曰幸勿多言於

是情好轉密帝每有求如外府焉及帝踐祚官至梁秦二
州刺史子春仕歷位胸山戍主東莞太守時青州石鹿山
臨海先有神廟刺史王神念以百姓祈禱糜費毀神影壞
屋舍當坐棟上有一大蛇長丈餘役夫打撲不禽得入海
水爾夜子春夢見人通名詣子春云有人見苦破壞宅舍
既無所託欽君厚德欲憩此境子春心密記之經二日而
知之甚警以爲前所夢神因辦牲醑請召安置一處數日
復夢一朱衣人相問辭謝云得君厚惠當以一州相報子
春心喜供奉彌勤經月餘魏欲襲胸山間諜前知子春設
伏摧破之詔授南青州刺史鎮胸山又遷都督梁秦二州

刺史子春雖無佗才行臨人以廉潔稱聞時混雜而身服
垢汙脚數年一洗言每洗則失財敗事云在梁州以洗足
致梁州敗太清二年徵爲左衛將軍遷侍中屬侯景亂元
帝令子春隨王僧辯攻平邵陵王又與左衛將軍徐文盛
東討景至貝磯與景遇子春力戰恒冠諸軍會郢州陷沒
軍遂退卒於江陵子鏗

鏗字子堅博涉史傳尤善五言詩被當時所重爲梁湘東
王法曹行參軍初鏗嘗與賓友宴飲見行觴者因回酒炙
以授之衆坐皆失鏗曰吾儕終日酣酒而執爵者不知其
味非人情也及侯景之亂鏗當爲賊禽或救之獲免鏗問

南史列傳五十四
五
之乃前所行觴者陳天嘉中為始興王中錄事參軍文帝
嘗宴羣臣賦詩徐陵言之帝即日召鏗預宴使賦新成安
樂宮鏗援筆便就帝甚歎賞之累遷晉陵太守貞外散騎
常侍頃之卒有文集三卷行於世

杜則京兆桂陵人也其先自北歸南居於雍州之襄陽子
孫因家焉父懷瑤少有志節梁天監中累有軍功後又立
功南鄭位梁秦二州刺史大同初魏軍復圍南鄭懷瑤命
第三子疑帥二百人與魏前鋒戰於北道寺溪矢中其目
失馬敵人交稍將至疑斬其二騎而上馳以歸疑旅之絕
人復馬善射一日中戰七八合所佩霜明朱弓四石餘力

班經纒稍長二丈五同心敢死士百七十人每出殺傷數
百人敵人憚之號為桂彪懷瑤卒於州謚曰桓侯疑位西
荊州刺史時讖言獨梁之下有暗天子元帝以疑其人也
會疑改葬父祖帝敕圖墓者惡為之逾年而疑卒疑弟
也幼有志氣居鄉里以膽勇稱後為新興太守太清三年
隨岳陽王來襲荊州元帝與崩兄岸舊密書邀之崩乃與
岸弟幼安兄子龔等夜歸元帝以為武州刺史封枝江縣
侯令隨領軍王僧辯東討侯景至巴陵景遣加侍中進爵
為公仍隨僧辯追景至石頭景敗崩入據臺城景軍加散
騎常侍江州刺史是月齊將郭元建攻秦州刺史嚴超達

於秦郡王僧辯令勦赴援陳武帝亦自歐陽來會元建衆
却勦因縱兵大破之元建遁時元帝執王琳於江陵琳長
史陸納等於長沙及元帝徵勦與王僧辯討之及納等戰
于車輪大敗之後納等降勦又與王僧辯西討平武陵王
於硤石旋鎮遭疾卒謚曰武勦兄弟九人兄嵩岑疑岌及
巖岸及弟從幼安並知名

岸字公衡太清中與勦隨岳陽王詵攻荊州同歸元帝帝
以爲北梁州刺史封江陵縣侯岸請以五百騎襲襄陽
去城三十里城中覺之詵夜知其師掩襄陽以岸等襄陽
豪帥於是夜遁歸襄陽岸等知詵至遂奔其兄南陽太守

巖於廣平營遣將尹正薛暉等攻拔之獲巖岸等并其母
妻子女並斬於襄陽北門營母龔保林數岸於衆岸曰老
婢教汝兒殺汝叔乃枉殺忠良詵命拔其舌齧殺而烹之
盡誅諸杜宗族親者幼弱下齏室又發其墳墓燒其骸骨
灰而揚之并以爲漆髑及建鄴平勦兄弟發安寧陵焚之
以報漆髑之酷元帝亦不責也

幼安性至孝寬厚雄勇過人與兄勦同歸元帝帝以爲西
荊州刺史封華容縣侯與王僧辯討河東王譽於長沙平
之又令助徐文盛東討侯景至貝磯大破景將任約斬其
儀同叱羅子通湘州刺史趙威方等仍進軍大舉漢口別

南史列傳卷四
攻拔武昌景度蘆洲上流以壓文盛幼安與衆軍大敗之
會景密遣騎襲陷郢州執刺史方諸人情大駭文盛由漢
口遁歸衆軍大敗幼安降景景以其多反覆殺之

龕岑之子也少驍勇善用兵與諸父歸元帝帝以爲郢州
刺史封中盧縣侯與王僧辯討平河東王譽又隨僧辯下
繼徐文盛軍至巴陵聞侯景陷郢州西上將至乃與僧辯
等守巴陵景至圍之數旬不剋而遁遷太府卿定州刺史
及衆軍至姑孰景將侯子鑒逆戰龕與陳武帝王琳等擊
之大敗子鑒遂至石頭景親會戰龕與衆軍大破之論功
爲軍授東揚州刺史又與王僧辯降陸納平武陵王及魏平

江陵後齊納貞陽侯明以紹梁嗣以龕爲震州刺史吳興
太守遷南豫州刺史封溧陽縣侯又加散騎常侍鎮南大
將軍龕僧辯壻也始爲吳興太守以陳武帝旣非素貴及
爲之本郡以法繩其宗門無所縱捨武帝銜之切齒及僧
辯敗龕乃據吳興以拒之頗敗陳文帝軍龕好飲酒終日
恒醉勇而無略部將杜泰私通於文帝說龕降文帝龕然
之其妻王氏曰霸先離隙如此何可求和因出私財賞募
復大敗文帝軍後杜泰降文帝龕尚醉不覺文帝遣人負
出項王寺前斬之王氏因截髮出家杜氏一門覆矣
王琳字子珩會稽山陰人也本兵家元帝居蕃琳姊妹並

入後庭見幸琳由此未弱冠得在左右少好武遂為將帥
大清二年帝遣琳獻米萬石未至都城陷乃中江沈米輕
舸還荆稍遷岳陽內史以軍功封建寧縣侯侯景遣將宋
子仙據郢州琳攻剋之禽子仙又隨王僧辯破景後拜湘
州刺史琳果勁絕又能傾身下士所得賞物不以入家
麾下萬人多是江淮羣盜平景之勲與杜龕俱為第一恃
寵縱暴於建鄴王僧辯禁之不可懼將為亂啓請誅之琳
亦疑禍令長史陸納率部曲前赴湘州身輕上江陵陳謝
將行請納等曰吾若不反子將安之咸曰請死相泣而別
及至帝以下吏而使廷尉卿黃羅漢太舟卿張載宣喻琳

軍陸納等及軍人並哭對使者莫肯受命乃繫黃羅漢殺
張載載性刻為帝所信荆州疾之如讎故納等因人之欲
抽其腸繫馬腳使統而走腸盡氣絕又齧割被五刑而斬
之元帝遣王僧辯討納納等敗走長沙是時湘州未平武
陵王兵下又甚盛江陵公私恐懼人有異圖納啓申琳無
罪請復本位求為奴婢元帝乃鎖琳送時納出兵方戰會
琳至僧辯升諸樓車以示之納等投戈俱拜舉軍皆哭曰
乞王郎入城即出及放琳入納等乃降湘州平仍復琳本
位使拒武陵王紀紀平授衡州刺史元帝性多忌以琳所
部甚盛又得衆心故出之嶺外又授都督廣州刺史其友

人主書李膺帝所任遇琳告之曰琳蒙拔擢常欲畢命以報國恩今天下未平遷琳嶺外如有萬一不虞安得琳力忖官正疑琳耳琳分望有限可得與官爭為帝乎何不以琳為雍州刺史使鎮武寧琳自放兵作田為國禦捍若警急動靜相知孰若遠棄嶺南相去萬里一日有變將欲如何琳非願長坐荆南政以國計如此耳膺然其言而不敢啓故遂率其衆鎮嶺南元帝為魏圍逼乃徵琳赴援除湘州刺史琳師次長沙知魏平江陵已立梁王詔乃為元帝舉哀三軍縞素遣別將侯平率舟師攻梁琳屯兵長沙傳檄諸方為進趣之計時長沙蕃王蕭韶及上游諸將推琳主

盟侯平雖不能度江頻被梁軍又以琳兵威不接翻更不受指麾琳遣將討之不剋又師老兵疲不能進乃遣使奉表詣齊并獻馴象又使獻款于魏求其妻子亦稱臣于梁陳武帝既殺王僧辯推立敬帝以待中司空徵琳不從命乃大營樓艦將圖義舉琳將張平宅乘一艦每將戰勝艦則有聲如野豬故琳戰艦以千數以野豬為名陳武帝遣將侯安都周文育等討琳仍受梁禪安都歎曰我其敗乎師無名矣逆戰於沌口琳乘平輿執鉞而麾之禽安都文育其餘無所漏唯以周鐵武一人背恩斬之鎖安都文育置琳所坐艦中令一閹豎監守之琳乃移湘州軍府就郢

城帶甲十萬練兵於白水浦琳巡軍而言曰可以為勤王之師矣溫太真何人哉南江渠帥熊曇朗周迪懷貳琳遣李孝欽樊猛與余孝頃同討之三將軍敗並為迪所囚安都文育等盡逃還建鄴初魏剋江陵之時永嘉王莊年甫七歲逃匿人家後琳迎還湘中衛送東下及敬帝立出質于齊請納莊為梁主齊文宣遣兵接送仍遣兼中書令李駟駮冊拜琳為梁丞相都督中外諸軍錄尚書事又遣中書舍人辛慈游詮之等齎璽書江表宣勞自琳以下皆有頒賜琳乃遣兄子叔寶率所部十州刺史子弟赴鄴奉莊纂梁祚於鄴州莊授琳侍中使持節大將軍中書監改封

安成郡公其餘並依齊朝前命及陳文帝立琳乃輔其次于濡湏口齊遣揚州道行臺慕容儼率眾臨江為其聲援陳遣安州刺史吳明徹江中夜上將襲益城琳遣巴陵太守任忠大敗之明徹僅以身免琳兵因東下陳遣太尉侯瑱司空侯安都等拒之瑱等以琳軍方盛引軍入蕪湖避之時西南風至急琳謂得天道將直取揚州侯瑱等徐出蕪湖躡其後比及兵交西南風翻為瑱用琳兵放火燧以擲瑱船者皆反燒其船琳船艦潰亂兵士透水死者十二三其餘皆棄船上岸為陳軍所殺殆盡初琳命左長史袁泌御史中丞劉仲威同典兵侍衛莊及軍敗泌遂降陳仲

威以莊授歷陽又送壽陽琳尋與莊同入齊齊孝昭帝遣
琳出合肥鳩集義故更圖進取琳乃繕艦分遣招募淮南
僮楚皆願戮力陳合州刺史裴景暉琳兄珉之壻也請以
私屬導引齊師孝昭委琳與行臺左丞盧潛率兵應赴沈
吟不決景暉懼事泄挺身歸齊齊孝昭賜琳璽書令鎮壽
陽其部下將帥悉聽以從乃除琳驃騎大將軍開府儀同
三司揚州刺史封會稽郡公又增兵秩兼給鏡吹琳水陸
戒嚴將觀釁而動屬陳氏結好於齊使琳更聽後圖琳在
壽陽與行臺尚書盧潛不協更相是非被召還鄴齊武成
置而不問除滄州刺史後以琳為特進侍中所居屋脊無
故剝破出赤蛆數升汗落地化為血蠕動有龍出於門外
之池雲霧起晝晦會陳將吳明徹寇齊齊帝敕領軍將軍
尉破胡等出援秦州令琳共為經略琳謂所親曰今大歲
在東南歲星居牛斗分太白已高皆利為客我將有喪又
謂破胡曰吳兵甚銳宜長策制之慎勿輕闕破胡不從戰
軍大敗琳單馬突圍僅而獲免還至彭城齊令便赴壽陽
許召募又進封琳巴陵郡王陳將吳明徹進兵圍之堰
肥水灌城而齊將皮景和等屯於淮西竟不赴救明徹晝
夜攻擊城內水氣轉侵人皆患腫死病相枕從七月至十
月城陷被執百姓泣而從之吳明徹恐其為變殺之城東北

二十里時年四十八哭者聲如雷有一叟以酒脯來至號
辭盡哀收其血懷之而去傳首建康懸之於市琳故吏梁
驃騎府倉曹參軍朱瑒致書陳尚書僕射徐陵求琳首曰
竊以朝市遷貿時傳骨鯁之風歷運推移間表忠貞之迹
故典午將滅徐廣爲晉家遺老當塗已謝馬字稱魏室忠
臣用能播美於前書垂名於後世梁故建寧公琳洛濱餘
膏汴川舊族立功代邸効績中朝當離亂之辰拯蕃伯
之任爾乃輕躬殉主以身許國寔追蹤於往彥信踵武於
前脩而天厭梁德尚思匡繼徒蘊包胥之念終遘萑弘之
眚洎王業光啓鼎祚有歸於是遠跡山東寄命河北雖輕

旅臣之歎猶懷客卿之禮感茲知己忘此捐軀至使身沒
九泉頭行萬里誠復馬革裹屍遂其生平之志原野暴骸
會彼人臣之節然身首異處有足悲者封樹靡上良可愴
焉瑒早造末僚預參下席降薛君之吐握荷魏公之知遇
是用霑巾雨袂痛可識之顏回腸疾首切猶生之面伏惟
聖恩博厚明詔爰發赦王經之哭許田橫之葬瑒雖芻蕘
竊亦有心琳經莅壽陽頗存遺愛曾游江右非無舊德比
肩東閣之吏繼踵西園之賓願歸彼境還脩窀穸庶孤墳
旣築或飛銜土之鸞豐碑式樹時留墮淚之人近故舊王
綰等已有論牒仰蒙制議不遂所陳昔廉公告逝即肥川

而建營域叔孫云亡仍芍陂而植楸櫟由此言之抑有其例不使壽春城下唯傳報葛之人滄洲島上獨有悲田之客昧死陳祈伏待刑憲陵嘉其志節又明徹亦數夢琳求首並為啓陳主而許之仍與開府主簿劉韶慧等持其首還于淮南權瘞八公山側義故會葬者數千人瑒等乃問道北歸別議迎接尋有揚州人茅智勝等五人密送喪柩達于鄴贈十五州諸軍事揚州刺史侍中特進開府錄尚書事諡曰忠武王葬給輜輶車琳體貌閑雅立髮委地喜怒不形於色雖無學業而強記內敏軍府佐史千數皆識其姓名刑罰不濫輕財愛士得將卒之心少為將帥屢經

喪亂雅有忠義之節雖本圖不遂齊人亦以此重之待遇甚厚及敗為陳軍所執吳明徹欲全之而其下將領多琳故吏爭來致請并相資給明徹由此忌之故及於難當時田夫野老知與不知莫不為之歔歔流泣觀其誠信感物雖李將軍之恂恂善誘殆無以加焉琳十七子長子敬在齊襲王爵武平末通直常侍第九子衍隋開皇中開府儀同三司大業初卒於渝州刺史

張彪不知何許人自云家本襄陽或云左衛將軍衡州刺史蘭欽外弟也少亡命在若邪山為盜頗有部曲臨城公大連出牧東揚州彪率所領客馬始為防閑後為中兵參

軍禮遇甚厚及侯景將宋子仙攻下東揚州復為子仙所知後去子仙還入若邪義舉征子仙不捷仍走向剡趙伯超兄子稜為侯景山陰令去職從彪後懷異心偽就彪計請酒為盟引刀子披心出血自歆彪信之亦取刀刺血報之刀始至心稜便以手案之望入彪心刀斜傷得不深稜重取刀刺彪頭面被傷頓絕稜謂已死因出外告彪諸將言已殺訖欲與求富貴彪左右韓武入視彪已蘇細聲謂曰我尚活可與手於是武遂誅稜彪不死復奉表元帝帝甚嘉之及侯景平王僧辯遇之甚厚引為爪牙與杜龕相似世謂之張杜貞陽侯踐位為東揚州刺史并給鼓吹室

富於財晝夜樂聲不息刻令王懷之不從彪自征之留長史謝歧居守會僧辯見害彪不自展拔時陳文帝已據震澤將及會稽彪乃遣沈泰吳寶真還州助歧保城彪後至泰等反與歧迎陳文帝入城彪因其未定踰城而入陳文帝遂走出彪復城守沈泰說陳文帝曰彪部曲家口並在香巖寺可往收取遂往盡獲之彪將申進密與泰相知因又叛彪復敗走不敢還城據城之西山樓子及暗得與弟崑崙妻楊氏去猶左右數人追隨彪疑之皆發遣唯常所養一犬名黃蒼在彪前後未曾捨離乃還入若邪山中沈泰說陳文帝遣章昭達領千兵重購之并圖其妻彪眠

未覺黃蒼驚吠劫來便嚙一人中喉即死彪拔刀逐之映
火識之曰何忍舉惡卿須我者但可取頭誓不生見陳舊
劫曰官不肯去請就平地彪知不免謂妻楊呼為鄉里曰
我不忍令鄉里落佗處今當先殺鄉里然後就死楊引頸
受刀曾不辭憚彪不下刀便相隨下嶺到平處謂劫曰卿
須我頭我身不去也呼妻與訣曰生死從此而別若見沈
泰申進等為語曰功名未立猶望鬼道相逢劫不能生得
遂殺彪并弟致二首於昭達黃蒼號叫彪屍側宛轉血中
若有哀狀昭達進軍迎彪妻便拜稱陳文帝教迎為家主
楊便改啼為笑欣然意悅請昭達殯彪喪塋家既畢黃蒼

又俯伏冢間號叫不肯離楊還經彪宅謂昭達曰婦人本
在容貌辛苦日久請暫過宅莊飾昭達許之楊入屋便以
刀割髮毀面哀哭慟絕誓不更行陳文帝聞之歎息不已
遂許為尼後陳武帝軍人求取之楊投井決命時寒比出
之垂死積火温燎乃蘇復起投於火彪始起於若邪與於
若邪終於若邪及妻夫皆為時所重異楊氏天水人散騎
常侍暎之女也有容貌先為河東裴仁林妻因亂為彪所
納彪友人吳中陸山才嘆泰等翻背刊吳昌門為詩一絕
曰田橫感義士韓王報主臣若為留意氣持寄禹川人
論曰忠義之道安有常哉善言者不必能行蹈之者恒在

所忽江子一胡僧祐太清之季名宦蓋微江則自致亡軀
胡亦期之殞命然則貞勁之節歲寒自有性也文盛克終
有鮮詩人得所誠焉子春戰乃先為幽通有助及乎梁州
之敗而以濯足為尤杜氏終致覆亡亦云圖墓之咎吉凶
之兆二者豈易知乎王琳亂朝忠節志雪仇恥然天方相
陳義難弘濟斯則大厦落構豈一木所能支也張彪一遇
何懷死而後已唯妻及大義悉感人記傳所陳何以加此
異乎

列傳第五十四

南史六十四

傳第五十五

南史六十五

陳宗室諸王

李

延壽

永脩侯擬

遂真侯詳

宣黃侯慧紀

衡陽獻王昌

子伯信

南康愍王曇朗

方泰

文帝諸子

宣帝諸子

後主諸子

永脩侯擬字公正陳武帝之疎屬也少孤貧質直強記武
帝南征交阯擬從焉梁紹泰二年除員外散騎常侍明威
將軍以雍州刺史資監南徐州事武帝踐祚廣封宗室詔

從子監南徐州擬封永脩縣侯北徐州刺史襄封鍾陵縣侯晃封建城縣侯景封上饒縣侯從孫明威將軍諡封虔化縣侯吉陽縣侯諡仍前封信威將軍柘封豫寧縣侯青州刺史詳討遂興縣侯貞威將軍慧紀封宜黃縣侯敬雅封寧都縣侯敬泰封平固縣侯文帝嗣位擬除丹楊尹坐事以白衣知郡尋復本職卒諡曰定天嘉二年配享武帝廟庭子黨嗣

遂興侯詳字文幾少出家為沙門善書記談論清雅武帝討侯景召令還俗配以兵馬從定建鄴永定二年封遂興縣侯天嘉三年累遷吳州刺史五年討周迪戰敗死之以

所統失律無贈諡子正理嗣

宜黃侯慧紀字元方武帝之從孫也涉獵書史負材任氣

從武帝平侯景及帝踐祚封宜黃縣侯除黃門侍郎太建

十年吳明徹北侵敗績以慧紀為緣江都督兗州刺史至

德二年為都督荊州刺史及梁安平王蕭巖晉熙王蕭瑒

等詣慧紀請降慧紀以兵迎之以應接功位開府儀同三

司禎明三年隋師濟江慧紀率將士三萬人船艦千餘乘

沿江而下欲趣臺城遣南康太守呂肅將兵據巫峽以五

條鐵鎖橫江肅竭其私財以充軍用隋將楊素奮兵擊之

四十餘戰爭馬峯山及磨刀澗守險隋軍死者五千餘人

陳人盡取其鼻以求功賞既而隋軍屢捷獲陳之士一縱
之肅乃遁保延洲別帥廖世龍領大舫詐降欲燒隋艦更
決死一戰於是有五黃龍備衆色各長十餘丈驥首連接
順流而東風浪大起雲霧晦冥陳人震駭不覺火自焚隋
軍乘高艦張大弩以射之陳軍大敗風浪應時頓息肅收
餘衆東走慧紀時至漢口為隋秦王俊拒不得進聞肅敗
盡燒公安之儲偽引兵東下因推湘州刺史晉熙王叔文
為盟主水軍都督周羅暎與郢州刺史荀法尚守江夏及
建鄴平隋晉王廣遣一使以慧紀子正業來喻又使樊毅
喻羅暎其上流城戍悉解甲於是慧紀及巴州刺史畢寶

並慟哭俱降慧紀入隋依例授儀同三司卒子正平頗有

文學

衡陽獻王昌字敬業武帝第六子也梁太清末武帝南征

李賁命昌與宣后隨沈恪還吳興及武帝東討侯景昌與

宣后文帝並為景囚景平拜長城國世子吳興太守時年

十六昌容貌偉麗神情秀朗雅性聰辯明習政事武帝遣

陳郡謝哲濟陽蔡景歷輔昌臨郡又遣吳郡杜之偉授昌

以經昌讀書一覽便誦明於義理剖析如流尋與宣帝俱

往荊州魏尅荊州又與宣帝俱遷長安武帝即位頻遣使

請宣帝及昌周人許而未遣及武帝崩乃遣之時王琳作

梗中流昌不得還居于安陸王琇平後又嘉元年二月昌
發自安陸由魯山濟江而巴陵王蕭沈等率百僚上表請
以昌為湘州牧封衡陽郡王詔曰可三月甲戌入境詔令
主書舍人緣道迎接丙子濟江於中流頒之使以溺告四
月庚寅喪柩至都上親臨哭乃下詔贈假黃鉞都督中外
諸軍事大宰揚州牧葬送之儀一依漢東平憲王齊豫章
文獻王故事謚曰獻無子文帝以第七皇子伯信嗣伯信
字孚之位西衡州刺史及隋師濟江與臨汝侯方慶並為
東衡州刺史王勇所害

南康愍王曇朗武帝母弟忠壯王休先之子也休先少倜
儻有太志梁簡文之在東宮深被知遇為文德主帥頃之
卒敬帝即位追贈南徐州刺史封武康縣公武帝受禪贈
司徒封南康郡王謚曰忠愍曇朗少孤尤為武帝所愛有
膽力善綏御侯景平後起家著作郎武帝誅王僧辯留曇
朗鎮京口知留府事紹泰元年除中書侍郎監南徐州二
年齊兵攻逼建鄴因請和末武帝子姪為質時四方州郡
並多未賓本根虛弱糧運不繼在朝文武咸願與齊和親
武帝難之而重違眾議乃決遣曇朗恐曇朗懼行或當奔
竄乃自率步騎京口迎之使質於齊齊皆約遣蕭軌等隨
徐嗣徽度沃武帝大破之虜蕭軌東方老等誅之齊人亦

害曇朗于晉陽時陳與齊絕弗之知武帝踐祚猶以曇朗襲封南康郡王奉忠壯王祀禮秩一同皇子天嘉二年齊人結好始知其亡文帝詔贈開府儀同三司南徐州刺史謚曰愍乃遣兼中郎令隨聘使江德藻迎曇朗喪柩三年春至都初曇朗未質於齊生子方泰方慶及將適齊以二妾自隨在比又生二子方華方曠亦同得還方泰少麤獷與諸惡少年羣聚游逸無度文帝以南康王故特寬宥之天嘉二年以為南康王世子及聞曇朗薨於是襲爵南康王太建四年為都督廣州刺史為政殘暴為有司奏免六年授豫章內史在郡不脩政事秩滿之際屢放部曲為劫

又縱火延燒邑居因行暴掠驅錄富人徵求財賄代至又淹留不還至都以為宗正卿未拜為御史中丞宗元饒所劾免官以王還第十一年起為寧遠將軍直殿省尋加散騎常侍其年八月宣帝幸大壯觀因大閱武命都督任忠領步騎十萬陣於玄武湖都督陳景領樓艦五百出於瓜步江上登玄武門觀宴羣臣以觀之因幸樂游苑設絲竹會仍重幸大壯觀集衆軍振旅而還時方泰當從啓稱所生母疾不行因與亡命楊鍾期等二十人微行往人間淫溥于岑妻為州長流所錄又率人仗抗拒傷損禁司為有司所奏上大怒下方泰獄方泰初承行淫不承拒格禁司

上固不承則上測方泰乃投列承引於是兼御史中丞徐君敷奏請解方泰所居官下宗正前爵士上可其奏禎明初爲侍中陳亡與後主俱入長安隋大業中爲掖縣令方慶少清敬言涉獵書傳及長有幹略天嘉中封臨汝縣侯至德二年累遷智武將軍武州刺史初廣州刺史馬靖久居嶺表得人心士馬強盛朝廷疑之以方慶爲廣州刺史以兵龍靖靖誅進號宣毅將軍方慶性清謹甚得人和禎明三年隋師濟江都督東衡州刺史王勇徵兵於方慶欲與赴援臺城時隋行軍總管韋洸帥兵度嶺宣隋文帝敕云若嶺南平定留勇與豐州刺史鄭萬頃且依舊職方

慶聞之恐勇賣已且欲叛變乃不從勇使高州刺史戴智烈斬方慶於廣州而收其兵鄭萬頃滎陽人梁司州刺史紹叔之始族子也父旻梁末入魏萬頃通達有材幹周武帝時爲司城大夫出爲溫州刺史至德中與司馬消難奔陳拜散騎常侍昭武將軍豐州刺史在州甚有惠政吏人表請立碑詔許焉初萬頃在周甚被隋文帝知遇及隋文帝踐祚常思還北及主三勇殺方慶萬頃乃率州兵拒勇降隋隋授上儀同尋卒

文帝十三男沈皇后生廢帝始興王伯茂嚴淑媛生鄱陽王伯山晉安王伯恭潘容華生新安王伯固劉昭華生衡

陽王伯信王充華生廬陵王伯仁張脩容生江夏王伯義
韓脩華生武陵王伯禮江貴妃生永陽王伯智孔貴妃生
桂陽王伯謀二男早卒無名伯信出繼衡陽王昌

始興王伯茂字鬱之文帝第二子也初武帝兄始興昭烈
王道談任梁為東宮首閣將軍侯景之亂援臺中流矢卒
紹泰二年贈南充州刺史封義興郡公謚曰昭烈武帝受
禪重贈太博改封始興郡王道談生文帝及宣帝宣帝以
梁承聖末遷於長安至是武帝遙以宣帝襲封始興嗣王
以奉昭烈王祀武帝崩文帝入纂帝位時宣帝在周未還
文帝以本宗乏饗徙封宣帝為安成王封伯茂為始興王

以奉昭烈王祀賜天下為父後者爵一級舊制諸王受封
未加戎號者不置佐史於是尚書八坐奏加伯茂寧遠將
軍置佐史除揚州刺史伯茂性聰敏好學謙恭下士又以
太子母弟文帝深愛重之特軍人於丹徒盜發晉都墓墓
大獲晉右將軍王羲之書及諸名賢遺跡事覺具書並沒
縣官截于祕府文帝以伯茂好古多以賜之由是伯茂大
工草隸書甚得右軍法要東揚州刺史鎮東將軍開府儀
同三司廢帝時伯茂在都劉師知等矯詔出宣帝伯茂勸
成之師知等誅後宣帝恐伯茂扇動朝廷乃進號中衛將
軍令入居禁中專與廢帝游處時四海之望咸歸宣帝伯

茂深不平數肆惡言宣帝以其無能不以爲意及建安人
將塔與韓子高等謀反伯茂與陰謀未成光武二年皇太
后令黜廢帝爲臨海王其日又下詔伯茂爲溫麻侯時
大門之外有別館以爲伯茂之所名爲昏第至是命
伯茂出居之宣帝建武元年卒年十八

鄱陽王伯山字靜之文帝第三子也偉容儀舉止閑雅喜
愠不形於色武帝時天下草創諸王受封儀注多闕及伯
山受封文帝欲重其事夫嘉元年七月丙辰尚書八坐奏
封鄱陽郡王乃遣度支尚書蕭容持節兼太宰告于太廟
又遣五兵尚書王質持節兼太宰告于太社其年十月上

臨軒策命策詔令王公以下並宴於王第六年爲緣江都
督平北將軍南徐州刺史宣帝輔政不欲令伯山處邊光
大元年徙爲東揚州刺史累遷征南將軍護軍將軍加開
府儀同三司給鼓吹并扶伯山性寬厚美風儀入於諸王
最長後主深敬重之每朝庭有冠昏饗宴恒使爲主及遭
所生憂居喪以孝聞後主嘗幸吏部尚書於徵宅因往弔
之伯山號慟殆絕因起爲鎮衛將軍乃請羣臣曰鄱陽王
平性可嘉又是西第之長豫章已東司其亦須遷太尉
未及發詔禎明三年薨葬於東陵諡長子丑範末
襲爵而隋師至時宗室王侯皆徙居餘人後主恐其爲

變乃並召入屯朝堂。後主入長安，隋文帝並配龍右六軍，敗績相率出降。因從後主入長安，隋文帝並配龍右及河西諸州各給田業以處之。大業二年，隋煬帝以後主第六女嫺為貴人，絕愛幸。因召陳氏子弟盡還京師，隨才叙用。由是並為守宰，徧於天下。君範位溫縣令。

新安王伯固，字牢之，文帝第五子也。生而龜背，目通睛，揚白形狀，眇小而俊，辯善言論。天嘉六年立為新安郡王。大建七年，累遷都督南徐州刺史。伯固性嗜酒，不好積聚，所得祿奉用度無節，酣醉以後多所乞。丐於諸王中，最為貧。竇宣帝每私之，特加賞賜，性輕率，好行鞭撻。在州不知政。

事日出田獵，或乘暇與至。於草間，呼人從游，動至旬日，所捕麋鹿多，使生致。宣帝頗知之，遣使責讓者數矣。十年為國子祭酒，頗知玄理，而惰業無所通。至於摘句問難，往往有奇意，為政嚴苛。國學有惰游不脩業者，重加禡楚。生徒懼焉。由是學業頗進。十三年為都督揚州刺史。後主初在東宮，與伯固甚親狎。伯固又善譎諛，宣帝每宴集，多引之。叔陵在江州，心害其寵，陰求瑕疵。將中以法及叔陵入朝，伯固懼罪，詭求其意，乃共誣毀朝賢。歷詆文武，雖耆年高位，皆面折無所畏忌。伯固性好射雉，叔陵又好開發冢，墓出游田野，必與偕行。於是情好大協，遂謀不軌。伯固侍

禁中每有密語必報叔陵及叔陵奔東府遣使告之伯固
單馬馳赴助叔陵指麾知事不捷便欲走會四門已閉不
得出因趣白楊道臺馬容至為亂兵所殺尸於昌館門時
年二十八詔特許以庶人禮葬子及所生王氏並特宥為
庶人國除

晉安王伯恭字肅之文帝第六子天嘉六年封尋為吳郡
太守時年十餘歲便留心政事官曹緝理歷位尚書左僕
射後為中衛將軍右光祿大夫陳亡入長安大業初為成
州刺史太常少卿

廬陵王伯仁字壽之文帝第八子天嘉六年立為侍中國

子祭酒領太子左庶子陳亡入長安

江夏王伯義字聖之文帝第九子天嘉六年封位金紫光
祿大夫陳亡入長安遷於瓜州道卒

武陵王伯禮字用之文帝第十子天嘉六年立太建初為
吳興太守在郡恣行暴掠後為有司所劾十一年被代徵
還遂遷延不發為御史中丞徐君整所劾免陳亡入長安
大業中為臨洮太守

永陽王伯智字策之文帝第十二子少敦厚有器局博涉
經史太建中立累遷尚書左僕射後為特進陳亡入長安
大業中為國子司業

桂陽王伯謀字深之文帝第十三子太建中立位散騎常侍薨子鄴大業中為番禾令

宣帝四十二男柳皇后生後主彭貴人生始興王叔陵曹淑華生豫章王叔英何淑儀生長沙王叔堅宜都王叔明魏昭華生建安王叔卿錢貴妃生河東王叔獻劉昭儀生新蔡王叔齊表昭容生晉熙王叔文義陽王叔達新會王叔坦王姬生淮南王叔彪巴山王叔雄吳姬生始興王叔重徐姬生尋陽王叔儼淳于姬生岳陽王叔慎王脩華生武昌王叔虞韋脩容生湘東王叔平施姬生臨賀王叔敖沅陵王叔興曾姬生陽山王叔宣揚姬生西陽王叔穆申

建始海陵王叔儉南郡王叔澄岳山王叔韶太原王叔表姬生新興王叔純吳姬生巴東王叔護劉姬生臨海王叔顯秦姬生新寧王叔隆新昌王叔榮其皇子叔叡叔忠叔泓叔毅叔訓叔武叔處叔封八人並未及封三子早卒無名

始興王叔陵字子高宣帝之第二子也梁承聖中生於江陵魏剋江陵宣帝遷關右叔陵留穰城宣帝之還以後主及叔陵為質天嘉三年隨後主還朝封康樂縣侯叔陵少機辯狗聲名強梁無所推屈太建元年封始興王奉昭烈王祀位都督江州刺史時年十六政自已出僚佐莫預焉

性嚴刻部下懼憚諸公子姪及罷縣令長皆逼令事已豫
章內史錢法成詣府進謁即配其子季卿將領馬仗季卿
慙耻不時至叔陵大怒侵辱法成法成憤怨自縊而死州
縣非其部內亦徵攝案之朝貴及下吏有乖忤者輒誣奏
其罪陷以重辟四年遷都督湘州刺史諸州鎮聞其至皆
震恐股慄叔陵日益橫征伐夷獠所得皆入己絲毫不以
賞賜徵求役使無有紀極夜常不卧執燭達曉呼召賓客
說人間細事戲謔無所不爲性不飲酒唯多置餼歲晝夜
食敢而已自旦至中方始寢寢曹局文案非呼不得輒白
容罪者皆繫獄動數年不省視瀟湘以南皆通爲一石廩

里殆無遺者其中脫有逃竄輒殺其妻子州縣無敢上言
宣帝弗之知九年除都督揚州刺史十年至都加扶給油
幢車叔陵居東府事務多關涉省閣執事之司承意順旨
即諷上進用之微致違忤必抵大罪重者至殊死道路藉
藉皆言其有非常志叔陵脩飾虛名每入朝常於車中馬
上執卷讀書高聲長誦陽陽自若歸坐齋中或自執斧斤
爲沐猴百戲又好游冢墓間遇有坐表主名可知者輒命
左右發掘取其石誌古器并骸骨肘脛持爲翫弄藏之府
庫人間少妻處女微有色貌者並即逼納十一年丁所生
母彭氏憂去職頃之起爲本職晉世王公貴人多葬梅嶺

及彭氏卒叔陵啓求梅嶺葬之乃發故太傅謝安舊墓棄去安柩以葬其母初喪日偽爲哀毀自稱刺血寫涅槃經未及十旬乃日進甘膳又私召左右妻女與之姦合所作尤不軌浸淫上聞宣帝責爲史中奉王政以不舉奏免政官又黜其典籤親事仍加鞭撻宣帝素愛叔陵不繩以法但責讓而已服闋又爲侍中中軍大將軍及宣帝不豫後主諸王並入侍疾叔陵陰有異志命典藥史礪切藥刀及舍卒之際又命左右取劍左右不悟乃取朝服所佩木劍以進叔陵怒及翌日小歛後主哀頓俯伏叔陵以剉藥刀所後主中項太后馳來救焉叔陵又斫太后數下後主乳

媪樂安君吳氏時在太后側自後掣肘後主因得起叔陵仍持後主衣後主自奮得免長沙王叔堅以手搯叔陵奪去其刀仍牽就柱以其褶袖縛之棄池水中將殺之間後主曰即盡之爲待也時吳媪已扶後主避賊叔堅求後主所在將受命叔陵多力因奮得脫突出雲龍門馳車還東府呼其甲士斷青溪橋道放東城囚以充戰士又遣人往新林追所部兵馬仍自被甲著白帽登城西門招募百姓散金銀以賞賜外召諸王將帥無有應者唯新安王伯固聞而赴之叔陵聚兵僅得千人欲據城保守時衆軍並緣江防守臺內空虛叔堅白太后使太子舍人司馬申急召

右衛將軍蕭摩訶將兵至府西門叔陵事急遣記室袁諒
送鼓吹與摩訶謂曰事捷以公為台鼎摩訶給報曰須王
心膂節將自來不敢從命叔陵即遣戴洸譚騏驎二人詣
摩訶摩訶執以送臺斬於閣道下持其首徇東城仍懸於
朱雀門叔陵自知不濟遂入沈其妃張氏及寵妾七人于
井中叔陵有部下兵先在新安於是率人馬數百自小航
度欲趣新林以舟艦入北行至白楊路為臺軍所邀伯固
見兵至即避入巷叔陵拔刀追之伯固復還叔陵部下多
棄甲潰散摩訶馬容陳智深迎刺叔陵屠豎王飛禽斫之
數十下馬容陳仲華就斬首送臺自當辛巳乃定尚書入

坐奏請依宋世故事流尸江中汙渚其室并毀其所生彭
氏墳廟謝氏之坐後主從所去叔陵諸子即日賜死
豫章王叔英字子烈宣帝第三子也寬厚仁愛太建元年
封後位司空隋大業中位涪陵太守卒

長沙王叔堅字子成宣帝第四子也母本吳中酒家婢相
者言當生貴子宣帝微時因飲通焉生叔堅及貴召拜淑
儀叔堅少而嚴整又頗使酒兄弟憚之好數術筮風角
鎔金琢玉並究其妙初封豐城侯太建元年封累遷丹楊
尹初叔堅與始興王叔陵並招聚賓客各爭權寵甚不平
每朝會因薄不肯為先後必分道而趨左右或爭道而鬪

至有死者及宣帝不豫叔堅與叔陵等並從後主侍疾叔陵陰有異志叔堅疑之微伺其所為及行逆賴叔堅以免以功進驃騎將軍開府儀同三司揚州刺史尋遷司空將軍刺史如故時後主患創不能視事政無大小悉決于叔堅權傾朝廷後主由是踈忌之孔範管斌施文慶等並東宮舊臣日久陰持其短至德元年乃詔令即本號用三司之儀出為江州刺史未發尋以為司空實欲奪其權又陰令人造其厭魅刻木為偶人衣以道士服施機關能拜跪晝夜於星月下醮之祝詛於上又令人上書告其事案驗今實後主召叔堅囚于西省將黜之令近侍宣敕數之叔

堅自陳為佞人所構死日慙見叔陵後主感其前功乃赦之免所居官以王還第後位中軍大將軍開府儀同三司荊州刺史秩滿還都陳亡入隋遷于瓜州叔堅素貴不知家人生產至是與妃沈氏酣酒不以耕種為事大業中為遂寧郡守卒

建安王叔卿字子弼宣帝第五子也性質直有材器容貌甚偉大建四年立位中書監陳亡入隋大業中為都官郎上黨通守

宜都王叔明字子昭宣帝第六子也儀容美麗舉止和柔狀似婦人大建五年立位侍中陳亡入隋大業中為鴻臚

少卿

河東王叔獻字子恭宣帝第九子也性恭謹敏好學太
建五年立位南徐州刺史薨贈司空謚康簡子孝寬嗣隋
大業中爲汝城令

新蔡王叔齊字子肅宣帝第十子也風采明贍博涉經
史善屬文太建七年立位侍中陳亡入隋大業中爲尚書
主客郎

晉熙王叔文字子才宣帝第十二子也性輕險好虛譽頗
涉書史大建七年立位都督湘州刺史徵爲侍中未還而
隋軍濟江隋秦王至漢口時叔文自湘州還朝至巴州乃

率巴州刺史畢寶等請啟殺書於秦王王遣使往巴州迎

勞叔文叔文與畢寶荊州刺史陳慧紀及文武將吏赴漢
口秦王並厚待之及至京隋文帝坐于廣陽門觀叔文從

後主至朝堂文帝使內史令李德林宣旨責其君臣不能
相弼以致喪亡後主與其羣臣並愧懼拜伏莫能仰視叔

文獨欣然有自得志後上表陳在巴州先送款望異常例
文帝嫌其不忠而方懷柔江表遂授開府宜州刺史

淮南王叔彪字子華宣帝第十三子也少聰慧善屬文太
建八年立位侍中入隋卒于長安

始興王叔重字子厚宣帝第十四子也性質朴無伎藝宣

帝崩始興王叔陵為逆誅其年立叔重為始興王以奉昭烈王後位江州刺史隋太業中為太府少卿

尋陽王叔儼字子思宣帝第十五子也性凝重舉止方正後主即位之位侍中入隋卒

岳陽王叔慎字子敬宣帝第十六子也少聰敏十歲能屬文太建十四年立至德中為丹楊尹時後主充愛文章叔慎與衡陽王伯信新蔡王叔賢等日夕陪侍賦詩恒被嗟賞禎明元年出為湘州刺史加都督及隋師濟江清和公楊素兵下荆州遣將龐暉略地至湘州州內將士剋日請除叔慎置酒會文武酒酣歎曰君臣之義盡於此乎長史謝

基伏而流涕湘州助防遂興侯正理在坐起曰主辱臣死諸君獨非陳國臣乎縱其無成猶見燕節青門之外有死不能今日後應者斬眾咸許諾乃刑牲結盟遣人詐奉降書於龐暉叔慎伏甲待之暉入伏兵發縛暉等以徇皆斬之叔慎招士眾數日中兵至五千人隋遣內陽公薛曹為湘州刺史聞龐暉死乃益請兵隋遣行軍總管劉仁恩救之未至薛曹禽叔慎秦王斬之漢口

義陽王叔達字子聽宣帝第十七子也太建十四年立位丹楊尹入隋大業中為內史舍人絳郡通守武德中位侍中封江國公歷禮部尚書卒

巴山王叔雄字子猛宣帝第十八子也太建十四年立入
隋卒于長安

武昌王叔虞字子安宣帝第十九子也太建十四年立入
隋大業中為高苑令

湘東王叔平字子康宣帝第二十子也至德元年立入隋
大業中為胡蘇令

臨賀王叔敷字子仁宣帝第二十一子也至德元年立入
隋大業中位儀同三司

陽山王叔宣字子通宣帝第二十二子也至德元年立入
隋大業中為涇城令

西陽王叔穆字子和宣帝第二十三子也至德元年立入
隋卒于長安

南安王叔儉字子約宣帝第二十四子也至德元年立入
隋卒于長安

南郡王叔澄字子泉宣帝第二十五子也至德元年立入
隋大業中為靈武令

沅陵王叔興字子推宣帝第二十六子也至德元年立入
隋大業中為給事郎

岳山王叔韶字子欽宣帝第二十七子也至德元年立位
丹楊尹入隋卒于長安

新興王叔純字子濬宣帝第二十八子也至德元年立入
隋大業中為河東令

巴東王叔護字子軌宣帝第二十九子也至德四年立入
隋大業中為汧陽令

臨海王叔顯字子亮宣帝第三十子也至德四年立入隋
大業中為鞏都令

新會王叔坦字子開宣帝第三十一子也至德四年立入
隋大業中為涿縣令

新寧王叔隆字子遠宣帝第三十二子也至德四年立入
隋卒于長安

新昌王叔榮字子徹宣帝第三十三子也禎明三年立入

隋大業中為內黃令

太原王叔匡字子佐宣帝第三十四子也禎明二年立入

隋大業中為壽光令

後主二十二男張貴妃生太子深會稽王莊孫姬生吳興

王胤高昭儀生南平王嶷呂淑媛生永嘉王彥邵陵王兢

龔貴嬪生南海王虔錢唐王恬張淑華生信義王祗徐淑

儀生東陽王恮孔貴人生吳郡王藩其皇子摠觀明綱統

冲洽緇綽威辯十一人並未及封

太子深字承源後主第四子也少聰慧有志操容止儼然

左右近侍未嘗見其喜愠以母張貴妃故特為後主所愛
至德元年封始安王位揚州刺史禎明二年皇太子胤廢
後主乃立深為皇太子隋師濟江隋將韓擒自南掖門入
百寮奔散深時年十餘歲閉閣而坐舍人孔伯魚侍隋軍
排闥入深使宣令勞之曰軍旅在道不乃勞也軍人咸致
敬焉隋大業中為枹罕太守武德初為秘書丞卒官

吳興王胤字承業後主長子也太建五年二月乙丑生於
東宮母孫姬因產卒沈皇后哀而養之以為己子後主年
長未有嗣宣帝命以為嫡孫詔為父後者賜爵一級十年
封永康公後主即位為皇太子胤性聰敏好學執經肄業

終日不倦博通大義兼善屬文得張貴妃孔貴嬪並愛幸
沈皇后無寵日夜構成后及太子之短孔範之徒又於外
合成其事禎明二年廢為吳興王加侍中衛將軍入隋卒
于長安

南平王嶷字承岳後主第二子也方正有器局年數歲風
采舉動有若成人至德元年立位揚州刺史遷都郢州
刺史入隋卒于長安

永嘉王彥字承懿後主第三子也至德元年立位都督江
州刺史入隋大業中為襄武令

南海王虔字承恪後主第五子也至德元年立位南徐州

刺史入隋大業中為涿令

信義王祗字承敬後主第六子也至德元年立位琅邪

城二郡太守入隋大業中為通議郎

邵陵王琬字承檢後主第七子也禎明元年立入隋大業

中為國子監丞

會稽王莊字承肅後主第八子也容貌最陋性嚴酷數歲

時左右有不如意輒刺刺其面或加燒爇性嗜酒愛博以

母張貴妃寵後主甚愛之至德元年立位揚州刺史入隋

大業中為昌隆令

東陽王心字承原後主第九子也禎明二年立入隋大業

中為通議郎

吳郡王藩字承廣後主第十子也禎明二年封隋大業中

為任城令

錢唐王恬字承悛後主第十一子也禎明二年封入隋卒

于長安

江左承西晉諸王開國並以戶數相差為大小三品大國

置上中下三將軍又置司馬一人次國置中下二將軍小

國置將軍一人餘官亦準此為美武帝受命自永定訖于

禎明唯衡陽王昌特加禮命至五千戶自餘大國不過二

千小國則千戶云

論曰有陳受命雖疆土日蹙然封建之典無革先王永脩
等並以踈屬列居蕃屏慧紀始終之迹其殆優乎衡陽南
康地皆懿戚提契以殞惟命也夫文宣二帝諸子不一都
陽岳陽風迹可紀古所謂維城盤石叔慎其近之乎

列傳第五十五

南史六十五

列傳第五十六

南史六十六

杜僧明

周文育子寶安

侯瑱

侯安都

歐陽頴子紇

黃法𣏲

淳于量

章昭達

吳明徹裴子烈

杜僧明字弘照廣陵臨澤人也形貌眇小而有膽氣善騎
射梁大同中盧安興為廣州刺史南江督護僧明與兄天
合及周文育並為安興所啓請與俱行頻征徠獠有功為
新州助防天合亦有材幹預在征伐安興死僧明復副其
子子雄及交州豪士李賁反逐刺史蕭詧詔奔廣州臺遣

子雄與高州刺史孫固討貴時春草已生瘴癘方起子雄請待秋討之廣州刺史新渝侯蕭映不聽蕭諮又促之子雄等不得已遂行至合浦死者十六七衆並憚役潰散禁之不可乃引其餘兵退還蕭諮啓子雄及固與賊交通逼遛不進梁武帝敕於廣州賜死子雄弟子略子烈並豪俠家屬在南江天合謀於衆曰盧公累葉待遇我等亦甚厚矣今見枉死而不能爲報非丈夫也我弟僧明萬人之敵若圍州城召百姓誰敢不從城破斬二侯然後待臺使至束手詣廷尉死猶勝生縱其不捷亦無恨矣衆咸忼慨曰是所願也唯足下命之乃與周文育等率衆結盟奉子雄

弟子略爲主以攻刺史蕭映子略頓城南天合頓城北僧明文育分據東西吏人並應之一日之中衆至數萬帝時在高要聞事起率衆來討大破之殺天合禽僧明及文育等並釋之引爲主帥武帝征交阯及討元景仲僧明文育並有功侯景之亂俱隨武帝入援建鄴武帝於始興破蘭裕僧明爲前鋒斬裕又與蔡路養戰於南野僧明馬被傷武帝馳救之以所乘馬授僧明僧明上馬復進殺數十人因而乘之大敗路養高州刺史李遷任又據大臯入瀨石以逼武帝武帝遣周文育爲前軍與僧明擊走之遷仕與寧都人劉孝尚分力將襲南康陳武又令僧明與文

育等拒之相持連戰百餘日卒禽遷仕送于武帝及帝下
南康留僧明頓西昌督安城廬陵二郡軍事梁元帝承制
授新州刺史臨江縣子侯景遣于慶等寇南江武帝頓豫
章命僧明為前驅所向剋捷武帝表僧明為長史仍隨東
討軍至蔡洲僧明率麾下燒賊水門大艦及景平除南充
州刺史進爵為侯仍領晉陵太守及荊州覆亡武帝使僧
明率吳明徹等隨侯瑱西援於江州病卒贈散騎常侍諡
曰威陳文帝即位追贈開府儀同三司配享武帝廟庭子
晉嗣

周文育字景德義興陽羨人也少孤貧本居新安言曰

姓項氏名猛奴年十一能反覆游水中數里跳高六尺與
羣兒聚戲眾莫能及義興人周蒼為壽昌浦口戍主見而
奇之因召與語文育對曰母老家貧兄弟姊並長大困於
賤役蒼哀之乃隨文育至家就其母請文育養為己子母
遂與之及蒼秩滿與文育還都見太子詹事周捨請制名
字捨因為立名為文育字景德命兄子弘讓教之書計弘
讓善隸書寫蔡邕勸學及古註可以遺之文育不之省謂弘
讓曰誰能學此取富貴但有大槩耳弘讓壯之教之騎射
文育大悅司州刺史陳慶之與蒼同郡素相善蒼會為前
軍主慶之使蒼將五百人往新蔡懸瓠慰勞白水蠻謀執

奮以入魏事覺奮與文育拒之時賊徒甚盛一日中戰數十合文育前鋒陷陣勇冠軍中嘗於陣戰死文育馳取其尸賊不敢逼及夕各引去文育身被九創創愈辭請還葬慶之壯其節厚加贈遺而遣之葬訖會盧安興為南江督護啓文育同行累征有功除南海令安興死後文育與杜僧明攻廣州為陳武帝所敗帝赦之後監州王勸以文育為長流深被委任勸被代文育欲與勸俱下至大庾嶺詣卜者卜者曰君北下不過作令長南入則為公侯文育曰足錢便可誰望公侯卜人又曰君須臾當暴得銀至二千兩若不見信以此為驗其夕宿逆必有賈人來與文育博

文育勝之得銀二千兩旦辭勸勸問其故文育以告勸乃遣之武帝聞其還太官分麾下配焉武帝之討侯景文育與杜僧明為前軍剋蘭裕授歐陽頔皆有功武帝破蔡路養於南野文育為路養所圍四面數重矢石雨下所乘馬死文育右手搏戰左手解鞶潰圍而出與杜僧明等相得并力復進遂大破之武帝乃表文育為府司馬李遷仕之據大臯遣其將擊杜平虜入瀨石魚梁作城武帝命文育擊之平虜棄城走文育據其城遷仕聞平虜敗留老弱於大臯悉選精兵自將以攻文育文育與戰遷仕稍却相持示解會武帝遣杜僧明來援別破遷仕水軍遷仕眾潰不

敢過太臯直走新淦梁元帝授文育義州刺史遷任又與
劉孝尚謀拒義軍武帝遣文育與侯安都杜僧明徐度杜
稜築城於白口拒之文育頻出與戰遂禽遷任武帝發自
南康遣文育將兵五千開通江路侯景將王伯醜據豫章
文育擊走之遂據其城累功封永遷縣侯武帝軍至白茅
灣命文育與杜僧明常為軍鋒及至姑熟與侯景將侯子
贖戰破之景平改封南移縣侯累遷散騎常侍武帝誅王
僧辯令文育督眾軍會文帝於吳興圍剋杜龕又濟江襲
會稽太守張彪得其郡城及文帝為彪所襲文育時頓城
北香巖寺文帝夜往趨之彪又來攻文育苦戰遂破平彪

武帝以侯瑱擁據江州命文育討之仍除南豫州刺史率
兵襲益城未剋徐嗣徽引齊人度江據蕪湖詔徵文育還
都嗣徽等乃列艦於青墩至于七磯以斷文育歸路及夕
文育鼓譟而發嗣徽等不能制至旦反攻嗣徽嗣徽驕示
鮑碎獨以小艦殿文育乘單舸舫跳入碎艦斬碎仍牽其
艦而還賊眾大駭因留船蕪湖自丹楊步上時武帝拒嗣
徽於白城適與文育會將戰風急武帝曰公不逆風文育
曰事急矣當決之何用古法抽契上馬而進眾軍隨之風
亦尋轉殺傷數百人嗣徽等移營莫府山文育徒頓對之
頻戰功最進爵昌縣公給鼓吹一部及廣州刺史蕭勃

舉兵踰嶺詔文育督眾軍討之時新吳洞主余孝頃舉兵
應勃遣其弟孝勸守郡城自出豫章據于石頭勃使其子
攷將兵與孝頃相會又遣其別將歐陽頽頓軍苦竹灘傳秦
據壘口城以拒官軍官軍船少孝頃有舡艦三百艘艦百餘
乘在上牢文育遣軍主焦僧度羊柬潛軍襲之悉取而歸
仍於豫章立柵時官軍食盡欲退還文育不許乃使人間
行遺周迪書約為兄弟并陳利害迪得書其喜許饋以糧
於是文育分遣老小乘故船舫沿流俱下燒豫章所立柵
偽退孝頃望之大喜因不設備文育由間道信宿達辛韶
辛韶上流則歐陽頽蕭勃下流則傅泰余孝頃文育據五

中間築城饗士賊徒天駭歐陽頽乃退入泥溪依城自守
文育遣嚴威將軍周鐵武與長史陸山才襲頽會之於是
盛陳兵甲與頽乘舟而宴以巡傳秦城下因攻秦剋之蕭
勃在南康聞之眾皆震懼其將潭世遠斬勃欲降為人所
害世遠軍主文侯明微持勃首以降蕭勃余孝頃猶據石
頭武帝遣侯安都助文育攻之攷降文育孝頃逃走新吳
廣州平文育還頓豫章以功授開府儀同三司王琳擁據
上流詔侯安都為西道都督文育為南道都督同會武昌
與琳戰於沌口為琳所執後得逃歸請罪詔不問復其官
爵及周迪殺余孝頃孝頃子公颺弟孝勸猶據舊柵擾動

南土武帝復遣文育及周迪黃法蕤等討之豫章內史熊曇朗亦率衆來會文育遣吳明徹為水軍配周迪運糧自率衆軍入象牙江築城於金口公颺偽降謀執文育事覺文育囚之送都以其部曲分隸衆軍乃捨舟為步軍進據三陂王琳遣將曹慶救孝勳分遣主帥常衆愛與文育相拒自帥所領攻周迪吳明徹軍迪等敗文育退據金口熊曇朗因其失利謀害文育以應衆愛文育監軍孫白象頗知其事勸令先之文育曰不可我舊兵少客軍多若取曇朗人皆驚懼亡立至矣不如推心撫之初周迪之敗棄船走莫知所在及得迪書文育喜齎示曇朗曇朗害之於坐

武帝聞之即日舉哀贈侍中司馬謚曰忠愍初文育之據三陂有流星墜地其聲如雷地陷方一丈中有碎炭數斗又軍市中忽聞小兒啼一市並驚馬聽之在上下軍人掘焉得棺長三尺文育惡之俄而迪敗文育見殺天嘉二年有詔配享武帝廟庭子寶安嗣文育本族兄景曜因文育官至新安太守

寶安字安人年十餘歲便習騎射以貴公子驕蹇游逸好狗馬樂驅馳靡衣媮食文育之為晉陽以征討不逞之郡令寶安監知郡事尤聚惡少年武帝患之及文育西征敗績繫於王琳寶安便折節讀書與士君子游綏御文育士

南史卷五十五
卒甚有威惠文育歸復除吳興太守文育為熊曇朗所害
徵寶安還起為猛烈將軍領其舊兵仍令南討文帝即位
深器重之寄以心旅精卒多配焉及平王琳頗有功周迪
之破熊曇朗寶安南入窮其餘燼天嘉二年重拜吳興太
守襲封壽昌縣公三年征留異為侯安都前軍異平除給
事黃門侍郎衛尉卿再遷左衛將軍領衛尉卿卒謚曰成
子碧嗣位晉陵定遠二郡

侯瑱字伯玉巴西充國人也父弘生迥累世為西蜀酋豪蜀
賊張文萼據白崖山有眾萬人梁益州刺史郗陽王蕭範
命弘遠討之弘遠戰死瑱固請復討母戰先鋒遂斬文萼

由是知名因事範範委以將節之任山谷夷獠不附者並
遣瑱征之累功授輕車府中兵參軍晉康太守範為雍州
刺史瑱除馮翊太守範遷鎮合肥瑱又隨之侯景圍臺城
範乃遣瑱輔其世子嗣入援都及城陷瑱嗣同退還合肥
仍隨範徙鎮益城俄而範及嗣皆卒瑱領其眾依于豫章
太守莊鐵鐵疑之瑱懼不自安詐引鐵謀事因刃之據豫
章之地後降於侯景將于慶慶送瑱於景景以瑱與已同
姓託為宗族待之甚厚留其妻子及弟為質遣瑱隨慶卒
蠡南諸郡及景敗巴陵景將宋子仙任約等並為西軍所
獲瑱乃誅景黨與以應義師景亦誅其弟及妻子梁元帝

授瑱南兖州刺史耶縣侯仍隨都督王僧辯討景恒為前鋒既復臺城景奔吳郡僧辯使瑒追景大敗之於吳松江以功除南豫州刺史鎮姑熟及齊遣郭元建出濡須僧辯遣瑒扞之太敗元建魏攻荊州王僧辯以瑒為前軍赴援未至而魏剋荊州瑒頓九江因衛晉安王還都承制以瑒為侍中江州刺史加都督改封康樂縣公及司徒陸法和據郢州引齊兵來寇乃使瑒西討未至而法和入齊齊遣慕容恃德鎮夏首瑒攻之恃德合兵盡請和瑒還鎮豫章僧辯使其弟僧愔與瑒共討蕭勃乃入陳武帝誅僧辯僧愔陰欲圖瑒而奪其軍瑒知之盡收僧愔徒黨僧愔奔齊是時

瑒據中流甚強又以本事王僧辯雖外示臣節未肯入朝初余孝頃為豫章太守及瑒鎮豫章乃於新吳縣別立城柵與瑒相拒瑒留軍人妻子於豫章令從弟彌知後事悉眾以攻孝頃自夏迄冬弗能剋彌與其部下侯方兒不協方兒下攻彌虜瑒軍府妓妾金玉歸于武帝瑒既失根本輕歸豫章豫章人拒之乃趨益城就其將焦僧度僧度勸瑒投齊瑒以武帝有大量必能容已乃詣闕請罪武帝復其爵位永定二年進位司空文帝即位進授太尉王琳至柵口又以瑒為都督侯安都等並隸焉天嘉元年二月王琳引合肥淩湖之眾舳舻相次而下瑒率軍進獸檻洲明

日合戰琳軍少却及夕東西風吹其舟艦並壞夜中有流星墜于賊營及旦風靜琳入浦以鹿角繞岸不敢復出時西魏將史寧躡其上流瑱聞之知琳不能持久收軍却據湖浦以待其弊及史寧至圍郢州琳恐眾潰乃率船來下去蕪湖十里而泊明日齊人遣兵助琳瑱令軍中晨炊葍食頓蕪湖洲尾以待之將戰有微風至自東南眾軍施拍縱火定州刺史章昭達乘平虜大艦中江而進琳軍大敗脫走以免者十二三琳因此入齊其年詔以瑱為都督五州諸軍事鎮益城周將賀若敦獨孤盛等來攻巴湘又以瑱為西討都督大敗盛軍以功授湘州刺史改封零陵郡

為二年薨贈大司馬諡曰壯肅配享武帝廟是子淨藏嗣

尚文帝女富陽公主

侯安都字成師始興山江人也為郡著姓父提少仕州郡

以忠謹稱安都貴後官至光祿大夫始興內史安都工隸

書能鼓琴涉獵書傳為五言詩頗清靡兼善騎射為邑里

雄豪侯景之亂招集兵甲至三千人陳武帝入援臺城安

都引兵從武帝攻蔡路養破李遷仕剋平侯景並力戰有

功封富川縣子隨武帝鎮京口除蘭陵太守武帝謀襲王

僧辯唯與安都定計仍使安都率水軍自京口趨石頭王

帝自從江乘羅落會之安都至石頭北棄舟登岸僧辯亦

之覺石頭城北接岡阜不甚危峻安都被甲帶長刀軍入
捧之投於女垣內衆隨而入進逼僧辯臥室武帝大軍亦
至與僧辯戰于聽事前安都自內閣出腹背擊之遂禽僧
辯以功授南徐州刺史武帝東討杜龕安都留臺居守徐
嗣徽任約等引齊寇入據石頭游騎至于闕下安都閉門
示弱令城中登陴看賊者斬及夕賊收軍還石頭安都夜
令士卒密營禦敵之具將旦賊騎至安都與戰大敗之賊
乃退還石頭不敢逼臺城及武帝至以安都為水軍於中
流斷賊糧運又襲秦郡破嗣徽柵收其家口得嗣徽所彈
琵琶及所養鷹為遺信餉之曰昨至弟往處得此今以相還

嗣徽等身之大懼尋求和武帝聽其還北及嗣徽等濟江

齊之餘軍猶據採石守備甚嚴又遣安都攻之多所俘獲

明年春詔安都率兵鎮梁山以備齊徐嗣徽等復入至湖

熟武帝追安都還拒之戰於耕壇南安都率十二騎突其

陣破之禽齊儀同乞扶無芳又刺齊將東方老墮馬會賊

騎至救老獲免賊北度蔣山安都又與齊將王敬寶戰於

龍尾使從弟曉軍主張纂前犯其陣曉被創墜馬張纂死

之安都馳往救曉斬其騎士十二人取纂尸而還齊軍不

敢逼武帝與齊軍戰於莫府山命安都自白下橫擊其後

大敗之以功進爵為侯又進號平南將軍改封西江縣公

仍督水軍出豫章助豫州刺史周文育討蕭勃安都未至
勃并禽其將歐陽顓傳泰等唯余孝頃與勃子
致獵於豫章之石頭作兩城孝頃與致各據其一又多設
船艦夾水而陣安都至乃銜枚夜燒其艦文育率水軍安
都領步騎登岸結陣孝頃俄斷後路安都乃令軍士豎柵
引營漸進頻致剋獲致乃降孝頃奔歸新吳請入子為質
許之以功加開府儀同三司仍率眾會武昌與周文育西
討王琳將發王公以下餞於新林安都躍馬度橋人馬俱
墜水中又坐舸內墜於槽井時以為不祥至武昌琳將樊
猛棄城走文育亦自豫章至時兩將俱行不相統攝因部

下文爭稍不平軍至郢州琳將潘純於城中遙射官軍安
都怒圍之未剋而王琳至奔口安都乃釋郢州悉眾往沌
口以禦之遇風不得進琳據東岸官軍據西岸相持數日
乃合戰安都等敗與周文育徐敬成並為琳囚搃以一長
鎖繫之置子舸下令所親官者王子晉掌視之琳下至盆
城白水浦安都等甘言許賂子晉子晉乃偽以小船住舸
而釣夜載安都文育敬成上岸入深草步投官軍還都自
劾詔並赦之復其官爵尋為丹楊尹出為南豫州刺史令
繼周文育攻余孝勸及王琳將曹慶常眾愛等安都自宮
亭湖出松門躡眾愛後文育為熊曇朗所害安都回取大

鱣遇琳將周炅周協南歸與戰破之炅炅協孝勳弟孝猷率部下四千家欲就王琳遇炅敗乃詣安都降安都又進軍於會稽洲破曹慶常衆愛築其船艦衆愛奔廬山為村人所殺餘衆悉平還軍至南皖而武帝崩安都隨文帝還朝乃與羣臣議翼奉文帝時帝謙讓弗敢當太后又以衡陽王故未肯下令羣臣不能決安都曰今四方未定何暇及遠臨川王有功天下須共立之今日之事後應者斬便按劍上殿白太后出璽义手解文帝髮推就喪次文帝即位遷司空仍授南徐州刺史給扶王琳下至柵口大軍出項蕪湖時候瑱為大都督而指麾經略多出安都及王

琳入齊安都進軍盆城討琳餘黨所向皆下仍別奉中旨迎衡陽獻王昌初昌之將入致書於文帝辭甚不遜帝不懌召安都從容而言曰太子將至須別求一蕃吾甚老焉安都對曰自古豈有被代天子愚臣不敢奉詔因自迎昌中流而殺之以功進爵清遠郡公自是威名甚重羣臣無出其右安都父捍為始興內史卒於官文帝徵安都為發喪尋起復本官贈其父散騎常侍金紫光祿大夫拜其母為清遠國太夫人仍迎赴都母固求停鄉里上乃下詔改桂陽郡之汝城縣為廬陽郡分衡州之始興安遠二郡合三郡為東衡州以安都從弟曉為刺史安都第三子祕年

九歲上以為始與內史並令在鄉侍養改封安都桂陽郡
 公王琳敗後周兵入據巴湘安都奉詔西捍及留異擁據
 東陽又奉詔東討異本謂臺軍自錢唐江上安都乃步由
 會稽之諸暨出永康異大恐奔桃枝嶺處巖公簡豎柵以
 拒守安都躬自接戰為流矢所中血流至踝安都乘輿麾
 軍容止不變因其山隴為堰屬夏潦水漲安都引船入堰
 樓艦與異城等放拍碎其樓異與第二子忠臣脫身奔晉
 安虜其妻子振旅而歸加侍中征北大將軍仍還本鎮吏
 人詣闕表請立碑頌美安都功績詔許之自王琳平後安
 都動庸轉大又自以功安社稷漸驕矜招聚文武盡州

小學堂

馳騁或以詩筆第其高下以差次賞賜之文士則結珎
 馬樞陰鏗張正見徐伯陽劉刪祖孫登武士則蕭摩訶裴
 子烈等並為之賓齋內動至千人部下將帥多不遵法度
 檢問收攝則奔歸安都文帝性嚴察深銜之安都日益驕
 慢表啓封訖有事未盡乃開封自書之云又啓某事及侍
 宴酒酣或箕踞傾倚嘗陪樂游榭飲之白帝曰何如作臨
 川王時帝不應安都再三言之帝曰雖天命抑亦明公
 之力宴訖又啓便借供張水飾將載妻妾於御堂歡會帝
 雖許其請甚不愜明日安都坐於御坐賓客居羣臣位稱
 觴上壽初重雲殿安都率將士帶甲入殿帝甚惡之自

是陰爲之備又周迪之反朝均當使安都討之帝乃使吳明徹討迪又頻遣使案問安都部下檢括亡叛安都內不自安天嘉三年冬遣其別駕周弘宣督託於舍人蔡景歷并問省中事景歷錄其狀奏之稱安都謀反帝慮其不受召明年春乃除安都爲征南大將軍甲州刺史自京口還都部伍入於石頭帝引安都宴於嘉德殿又集其部將帥會于尚書朝堂於坐收安都囚于西省又收其將帥盡奪馬仗而釋之因出景歷表於朝之下詔暴其罪明日於西省賜死尋有詔省其妻子家口并以其禮初武帝嘗與諸將宴杜僧明周又有侯安都爲壽各稱功德帝曰

等悉良將也而並有所短杜公志大而識暗狎於下而驕於尊矜其功不收其拙周侯交不擇人而推心過差居危履險猜防不設侯即傲誕而無厭輕佻而肆志並非全身之道卒皆如言太建三年宣帝追封安都陳集縣侯子宣爲嗣

歐陽頴字靖世長沙臨湘人也爲郡豪族少質且有思理以言行著於嶺表父喪哀毀甚至家產累積悉讓諸兄廬於麓山寺傍專精習業博通經史年三十其兄逼令從官梁左衛將軍蘭欽少與頴善故頴常隨欽征討欽南征夷獫狁陳文徹所獲不可勝計大獻銅鼓累代所無頴預其

功還為直閣將軍欽征交州復啓顧同行欽受嶺而平顧
除臨賀內史啓乞送欽喪還都然後之任時湘衡界五十
餘洞不賓敕衡州刺史韋粲討之粲委顧為都督悉皆平
殄侯景構逆粲自解還都征景以顧監衡州臺城陷後嶺
南互相吞併蘭欽弟前高州刺史裕攻始興內史蕭昭基
奪其郡以兄欽與顧舊遣招之顧不從謂使曰高州昆季
隆顯莫非國恩今應赴難援都豈可自息而跋扈及陳武帝
入援都將至始興顧乃深自結託裕遣兵攻顧武帝援之
裕敗武帝以王懷明為衡州刺史遷顧為始興內史武帝
之討蔡路養李遷仕也顧助帝平之梁元帝承制以始興

郡為東衡州以顧為刺史封新昌縣伯侯景平元帝徧問
朝宰使各舉所知羣臣未對元帝曰吾已得一人矣歐陽
顧甚公正本有匡濟才恐蕭廣州不肯致之乃授武州刺
史尋授郢州欲令出嶺蕭勃留之不獲拜命尋授衡州刺
史進封始興縣侯時蕭勃在廣州兵強位重元帝深患之
遣王琳代為刺史琳已至小桂嶺勃遣其將孫瑒監州盡
率部下至始興避琳兵鋒顧別據一城不往謁勃閉門高
壘亦不拒戰勃怒遣兵襲顧盡收其貲財馬仗尋赦之還
復其所復與結盟魏平荊州顧委質於勃及勃度嶺出南
康以顧為前軍都督周文育破禽之送于武帝帝釋而禮

南史列傳五十六
之蕭勃死後嶺南亂顧有聲南土且與武帝有舊乃授安南將軍衡州刺史封始興縣侯未至嶺顧子紇已剋始興及顧至嶺南皆懾伏仍進廣州盡有越地改授都督交廣等十九州諸軍事平越中即將廣州刺史王琳據有中流顧自海道及東嶺奉使不絕永定三年即本號開府儀同三司文帝即位進號征南將軍改封陽山郡公初交州刺史表曇緩密以金五百兩寄顧令以百兩還合浦太守襲為四百兩付兒智矩餘人弗之知顧尋為蕭勃所破貲財並盡唯所寄金獨存曇緩亦尋卒至是顧並依信還之時人莫不歎伏之時顧合門顯貴威振南土又多致銅鼓生

口獻奉珍異前後委積頗有助軍國天嘉四年薨贈司空謚曰穆子紇嗣紇字奉聖頗有幹略襲父官爵在州十餘年威惠著於百越宣帝以紇父在南服頗疑之太建元年徵為左衛將軍其部下多勸之反遂舉兵攻衡州刺史錢道戢詔儀同章昭達討禽之送至都伏誅子詢以年幼免黃法甌字仲昭巴山新建人也少勁捷有膽力日步行二百里能距躍三丈頗便書疏開明簿領出入州郡中為鄉閭所憚侯景之亂於鄉里合徒眾太守賀詡下江州法甌監知郡事陳武帝將踰嶺入援建鄴李遷仕作梗中途武帝命周文育屯西昌法甌遣兵助文育時法甌出頓新淦

南史及傳五十六
縣景遣行臺于慶來襲新淦法甌敗之梁元帝承制授交
州刺史資領新淦縣令封巴山縣子敬帝即位改封新建
縣侯太平元年割江西四郡置高州以法甌為刺史鎮巴
山蕭勃歐陽頎來攻法甌破之永定三年王琳遣李孝欽
樊猛余孝頃攻周迪且謀取法甌法甌援迪禽孝頃等三
將以功授平南將軍開府儀同三司熊曇朗於金口害周
文育法甌共周迪討平之天嘉三年周迪反法甌與吳明
徹討平迪法甌功居多廢帝即位進爵為公太建五年大
舉北侵法甌為都督出歷陽於是為拋車及步艦豎拍以
逼之砲加其樓堞剋之盡誅其戍卒進兵合肥望旗降款

法甌蔡侵掠躬自勞撫而與之盟並放還北以功加侍中
改封義陽郡公七年為豫州刺史鎮壽陽薨贈司空謚曰
威子玩嗣

淳于量字思明其先濟北人也世居建業父文成仕梁為
將帥位梁州刺史量少善自居處偉姿容有幹略便弓馬
梁元帝為荊州刺史文成分量人馬令往事焉以軍功封
廣晉縣男侯景之亂梁元帝凡遣五軍入援臺量預其一
臺城陷量還荊州元帝承制以為巴州刺史侯景西上攻
巴州元帝使都督王僧辯入據巴陵量與僧辯并力拒景
大敗之禽其將任約進攻郢州獲宋子仙仍隨僧辯平侯

景封謝沐縣侯尋出為都督桂陽刺史及魏剋荊州量保
 桂州王琳擁割湘郢累遣召量量外雖與琳往來而別遣
 使歸陳武帝武帝受禪進位鎮西大將軍開府儀同三司
 天嘉五年徵為中撫軍大將軍量所部將率多戀本土並
 欲逃入山谷不願入朝文帝使湘州刺史華皎征衡州且
 以兵迎量天康元年至都以在道淹留為有司奏免儀同
 餘如故華皎構逆以量為征南大將軍西討大都督摠率
 大艦自郢州樊浦拒之皎平并降周將長湖公元定等以
 功授侍中中軍大將軍開府儀同三司進封醴陵縣公未
 拜出為南徐州刺史太建元年進號征北大將軍給扶三

年就江陰王蕭季卿買梁陵中樹季卿坐免量免侍中尋
 復侍中吳明徹之北侵也量讚成其事又遣第六子岑率
 所領從軍淮南剋定量改封始安郡公及周獲吳明徹乃
 以量為都督水陸諸軍事車騎將軍都督南兖州刺史十
 四年薨贈司空

章昭達字伯通吳興武康人也性倜儻輕財尚氣少時遇
 相者謂曰卿容貌甚善須小虧則當富貴梁大同中昭達
 為東宮直後因醉墮馬影翳角小傷昭達喜之相者曰未也
 侯景之亂昭達率鄉人接臺為流矢所中眇其一目相者
 見之曰卿相善矣不久當富貴臺城陷昭達還鄉里與陳

文帝游因結君臣分侯景平文帝為吳興太守昭達杖策
來謁文帝見之大喜因委以將帥恩寵超於儕等陳武帝
謀討王僧辯令文帝還長城招聚兵眾以備杜龕頻使昭
達往京口稟承計畫僧辯誅後杜龕遣其將杜泰來攻長
城昭達因從文帝進軍吳興以討龕龕平又從討張彪於
會稽剋之累功除定州刺史時留異擁據東陽武帝患之
乃使昭達為長山令居其心腹天嘉元年追論長城功封
欣樂縣侯尋隨侯安都拒王琳昭達乘平虜大艦中流而
進先鋒發拍中賊艦王琳平昭達策勳第一二年除都督
郢州刺史周迪據臨川反詔昭達便道征之迪敗走徵為

護軍將軍改封邵武縣侯四年陳寶應納周迪共寇臨川
又以昭達為都督討迪迪走昭達乃踰嶺討陳寶應與戰
不利因據上流為筏施拍其上壞其水柵又出兵攻其步
軍方大合戰會文帝遣余孝頃出自海道適至因并力乘
之遂定閩中盡禽留異寶應以功授鎮軍將軍開府儀同
三司初文帝嘗夢昭達升台鉉及旦以夢告之至是侍宴
酒酣顧昭達曰卿憶夢不何以償夢昭達對曰當効大馬
之用以盡禮節自餘無以奉償尋出為都督江州刺史廢
帝即位改封邵陵郡公華皎之反其移文並假以昭達為
辭又頗遣使招之昭達盡執其使送都秩滿徵為中撫大

將軍宣帝即位進號車騎大將軍以還朝遲留為有司所
 劾降號車騎將軍歐陽紇據嶺南反詔昭達都督衆軍征
 之紇聞昭達奄至乃出頓淮口聚沙石盛以竹籠置於水
 柵之外用遏舟艦昭達居其上流裝艦造拍以臨賊柵又
 令人銜刀潛行水中以斫竹籠籠篋皆解因縱大艦突之
 大敗紇禽之送都廣州平進位司空太建二年征江陵時梁
 明帝與周軍大蓄舟艦於青泥中昭達分遣偏將錢道戢
 程文季乘輕舟焚之周又於峽口南岸築壘名安蜀城於
 江上橫引大索編葦為橋以度軍糧昭達乃命軍士為長
 戟施樓船上仰割其索索斷糧絕因縱兵攻其城降之三

年於軍中病薨贈大將軍昭達性最刻母奉命出征必晝
 夜倍道然其所剋必推功將帥厨膳飲食並同羣下將士
 亦以此附之每飲會必盛設女伎雜樂備羌胡之聲音律
 姿容並一時之妙雖臨敵雨之廢也四年配享文帝廟庭
 子大寶襲邵陵郡公位豐州刺史在州貪縱百姓怨酷後
 主以太僕卿李暈代之乃襲殺暈而反尋被禽梟首朱雀
 航夷三族

吳明徹字通炤秦郡人也父樹梁右軍將軍明徹幼孤性
 至孝年十四感墳塋未脩家貧無以取給乃勤力耕種時
 天下亢旱苗稼焦枯明徹哀憤母之田中號哭仰天自訴

居數日有白田還者云苗已更生明徹疑其給已及往如
言秋而大獲人充葬用時有伊氏者善占墓謂其兄曰君
葬日必有乘白馬逐鹿者經墳此是最小孝子大貴之徵
至時果有應明徹即樹之小子也及侯景寇都明徹有粟
麥三千餘斛而鄰里飢餓乃白諸兄曰今人不圖久奈何
不與鄉里共此於是計口平分同其豐儉羣盜聞而避焉
賴以存者甚衆陳武帝鎮台口深相要結明徹乃詣武帝
帝為之降階執手即廣明堂亦微涉書史經傳就以南周
弘正學天文孤虛遁甲略通其術頗以英雄自許武帝亦
深奇之及受禪授安南將軍與侯安都周文育將兵討王

琳及衆軍敗沒明徹自拔還都文帝即位以本官加右衛
將軍及周迪反詔以明徹為江州刺史領豫章太守摠衆
軍以討迪明徹雅性剛直統內不甚和帝聞之遣安成
王瑱代明徹令以本號還朝天嘉五年遷吳興太守及引
辭之郡帝謂曰吳興雖郡帝鄉之重故以相授廢帝即位
授領軍將軍尋遷丹楊尹仍詔以甲仗四十人出入殿省
到仲舉之矯令出宣帝也毛喜知其詐宣帝懼遣喜與明
徹籌焉明徹曰嗣君諒闇萬機多闕殿下親實周乃德冠
伊霍願留中深計慎勿致疑及湘州刺史華皎陰有異志
詔授明徹都督湘州刺史仍與征南大將軍淳于量等討

皎皎平授開府儀同三司進爵為公太建五年朝議北征公
卿互有異同明徹決策請行詔加侍中都督征討諸軍事
摠衆軍十餘萬發都緣江城鎮相續降款軍至秦郡齊大
將軍尉破胡將兵為援破走之秦郡降宣帝以秦郡明徹
舊邑詔具大牢令拜祠上冢文武羽儀甚盛鄉里榮之進
剋仁州授征北大將軍進封南平郡公進逼壽陽齊遣王
琳拒守明徹乘夜攻之中宵而潰齊兵退據相國城及金
城明徹令軍中益脩攻具又逼肥水灌城城中苦濕多腹
疾疋是皆腫死者十六七會齊遣大將皮景和率兵數十
萬來援去壽春三十里頓軍不進諸將咸曰計將安出明

徹曰兵貴在速而彼結營不進自挫其鋒吾知其不敢戰
明矣於是躬擐甲胄四面疾攻城中震恐一鼓而禽王琳
等送建鄴景和懼而遁走詔以為車騎大將軍豫州刺史
增封并前三千五百戶遣謁者蕭渙就壽陽授策明徹於
城南設壇士卒二十萬陳旗鼓戈甲登壇拜受成禮而退
六年自壽陽入朝輿駕幸其第賜鍾磬一部七年進攻彭
城軍至呂梁又大破齊軍八年進位司空給大都督夫金
龍麾尋授都督南兖州刺史及周滅齊宣帝將事徐兖
年詔明徹北侵令其世子慧覺攝行州事軍至呂梁周徐
梁士彥率衆拒戰明徹頻破之仍迓清水以灌其

城攻之甚急環列舟艦於城下周遣上大將軍王軌救之
軌輕行自清水入灌口橫流豎采以鐵鎖貫車輪遇斷船
路諸將聞之甚恐議欲破堰拔軍以舫載馬馬明成裴子
烈曰君若決堰下船船必傾倒豈可得乎不如前遣馬出
適會明徹苦背疾甚篤知事不濟遂從之乃遣蕭摩訶帥
馬軍數千前還明徹仍自決其堰乘水力以退軍及至清
口水力微舟艦並不得度衆軍皆潰明徹窮蹙乃就執周
封懷德郡公位大將軍以憂薨疾卒於長安後故吏盜其
柩歸至德元年詔追封邵陵侯以其息慧覺嗣裴子烈字
大士河東聞喜人梁負外散騎常侍猗之子少孤有志氣

以驍勇聞位北譙太守與陝內史封海安伯

論曰古人云知臣莫若君書曰知人則哲觀夫陳武論將
而周侯遇禍有以知斯言之非妄矣若不然者亦何以驅
駕雄傑而創基撥亂者乎故瑱顧並自奔囚翻同有亂
量望風景附自等誠臣良有以也昭達勤王之略遠符耿
奔行已之方頗同吳漢既眇而貴亦黥而王吉凶之筭豈
人事也明徹屬運否之期當關土之任才非韓白識暗孫
吳知進而不知止知得而不知喪犯斯不韙師亡國蹙
矣哉

列傳第五十六

南史六十六

南史列傳五十六

廿四

列傳第五十七

南史六十七 僧正

胡穎

李一

延壽

杜稜

徐度

子敬成

程靈洗子奉

沈恪

陸子隆

錢道戢

駱文牙

孫瑒

徐世譜

周敷

荀朗

周昊

魯承達 弟廣達

蕭摩訶子世廉

南史列傳五十七

任忠

樊毅弟種

胡穎字方秀吳興人也偉姿容性寬厚梁末陳武帝在廣
州穎深自結託從克元景仲平蔡路養李遷仕皆有功武
帝進軍頓西昌以穎為巴丘令鎮大阜督糧運下至豫章
以穎監豫章郡武帝率眾與王僧辯會白茅灣同討侯景
以穎知留府事梁承聖初元帝授穎羅州刺史封漢陽縣
侯尋除豫章內史隨武帝鎮京口齊遣郭元建出東關武
帝令穎率府內驍勇隨侯瑱於東關大破之後從武帝襲
王僧辯又隨周文育於吳興討杜龕武帝受禪兼左衛將
軍天嘉元年除散騎常侍吳興太守卒官謚曰壯二年配

享武帝廟庭子六同嗣

徐度字孝節安陸人也少儻不拘小節及長姿貌瓌偉
嗜酒好博恒使僮僕屠酤為事初從梁始興內史蕭介征
諸山洞以驍勇聞陳武帝在交阯乃委質焉侯景之亂武
帝克廣州平蔡路養破李遷仕討畫多出於度侯景平後
追錄前後戰功封廣德縣侯武帝鎮朱方除蘭陵太守武
帝遣衡陽獻王桂荆州度率所領從焉江陵覆亡間行東
歸武帝東討杜龕秦敬帝幸京口以度領宿衛并知留府
事徐嗣徽任約等乘寇武帝與敬帝還都時賊已據石頭
使度頓軍於冶城寺明年嗣徽等又引齊寇濟江度隨衆

軍破之於北郊壇以功除郢州刺史兼領吳興太守文帝
即位累遷侍中中撫將軍開府儀同三司進爵為公天嘉
元年以平王琳功改封湘東郡公及太尉侯瑱薨于湘州
以瑳代瑱為都督湘州刺史秩滿復為侍中中軍大將軍
文帝崩度預顧命許以甲仗五十人入殿省廢帝即位進
位司空瑳贈太尉諡曰忠肅太建四年配享武帝廟庭子
敬成嗣

敬成幼聰慧好讀書起家著作佐郎永定元年領度所部
士卒隨周文育侯安都征王琳於沌口敗績為琳所繫三
年隨文育安都得歸父度為吳郡太守以敬成監郡光大

元年為巴州刺史尋為水軍隨吳明徹平華皎太建二年
以父憂去職尋起為南豫州刺史襲爵湘東郡公五年除
吳興太守隨都督吳明徹北討出秦郡別遣敬成為都督
乘金翅自歐陽引埭浙江由廣陵齊人皆城守弗敢出自
繁梁湖下淮剋淮陰山陽鹽城三郡仍進剋鬱州進號壯
武將軍鎮胸山坐於軍中輒科訂并誅新附者免官尋除
安州刺史鎮宿豫卒諡曰思子敬嗣

杜稜字雄盛吳郡錢唐人也少落魄不為時知頗涉書傳
游嶺南事梁廣州刺史新渝侯蕭映卒從陳武帝平蔡
路養李遷仕皆有功梁元帝承制授石州刺史上陌縣侯

侯景平後武帝鎮朱方以稜監義興琅邪二郡武帝謀誅
王僧辯引稜與侯安都等共議稜難之武帝懼其泄已乃
以手巾絞稜悶絕於地因閉於別室軍發召與同行及
僧辯平後武帝東征杜龕等稜留與安都居守徐嗣徽任
約引齊師濟江攻臺城安都與稜隨方抗拒未嘗解帶賊
平以功除右衛將軍丹陽尹永定元年位侍中中領軍武
帝崩文帝在南院時內無嫡嗣外有強敵侯瑱侯安都徐
度等並在軍中朝廷宿將唯稜在都獨典禁兵乃與蔡景
歷等祕不發喪奉迎文帝文帝即位遷領軍將軍以預建
立功改封永城縣侯位丹陽尹廢帝即位加特進侍中光

大元年解君量置佐史給扶太建元年出為吳興太守二
年徵為侍中尋加特進護軍將軍三年以公事免侍中護
軍四年復為侍中右光祿大夫將軍佐史扶並如故稜歷
事三帝並見恩寵末年不預征役優游都下頃之卒于官
贈開府儀同三司謚曰成配享帝武廟庭子安世嗣

周鐵武不知何許人也語音愴重膂力過人使馬梨事梁
河東王蕭譽以勇敢聞譽為湘州以為臨蒸令侯景之亂
梁元帝遣世子方等伐譽拒戰大捷方等死鐵武功最
及王僧辯討於譽陣獲之將烹焉鐵武呼曰侯景未滅奈
何殺壯士僧辯奇其言宥之還其麾下及侯景西上鐵武

從僧辯剋任約獲宋子仙每戰有功元帝承制授潼州刺史封沘陽縣子又從僧辯定建業降謝朓仁平陸納於湘州錄前後功進爵為侯陳武帝誅僧辯鐵武率所部降因復其本職徐嗣徽引齊寇度江鐵武破其水軍嗣徽平遷太子左衛率尋隨周文育拒蕭勃文育禽鐵武偏軍龔勃禽勃前軍歐陽頎又隨文育西征王琳於沘口敗績與文育侯安都並為琳所禽琳見諸將與語唯鐵武辭氣不屈故琳盡宥文育之徒獨鐵武見害贈侍中護軍天嘉三年文帝又詔配食武帝廟庭子瑜嗣

程靈洗字玄滌新安海寧人也少以勇力聞步行日二百

里便騎善游素為鄉里畏伏侯景之亂據縣歛聚徒以拒

景景軍據有新安新安太守湘西鄉侯蕭隱奔依靈洗靈洗奉以主盟梁元帝授靈洗譙州刺史資領新安太守封

巴丘縣侯後助王僧辯鎮防及武帝誅僧辯靈洗率所領來援其夜力戰於石頭西門武帝軍不利遣使招喻父之

乃降帝深義之授蘭陵太守仍助防京口及平徐嗣徽靈洗有功除南丹楊太守封遂安縣侯後隨周文育西討王

琳軍敗為琳所拘尋與侯安都等逃歸累遷太子左衛率武帝崩王琳前軍東下靈洗於南陵破之虜其兵士并獲

青龍十餘乘以功授都督南豫州刺史侯瑱等敗王琳于

柵口靈洗逐北據有魯山徵為左衛將軍天嘉四年周迪
重寇臨川以靈洗為都督自鄱陽別道擊之迪又走山谷
間遷中護軍出為都督郢州刺史廢帝即位進號雲麾將
軍華皎之反遣使招靈洗靈洗斬皎使以聞朝廷深嘉其
忠因推心待之使其子文季領水軍助防時周將元定率
步騎二萬助皎圍靈洗靈洗嬰城固守及皎敗乃出軍躡
定定不獲濟江以其衆降因進攻剋周沔州禽其刺史裴
寬以功改封重安縣公靈洗性嚴急御下甚苛刻士卒有
小罪必以軍法誅之號令分明與士卒同甘苦衆亦以此
德之性好播植躬勤耕稼至於水陸所宜刈穫早晚雖老
農不能及也妓妾無游手並督之紡績至於散用貲財亦
弗儉吝卒贈鎮西將軍開府儀同三司謚曰忠壯太建四
年配享武帝廟庭子文季嗣

文季字少卿幼習騎射多幹略果決有父風靈洗與周文
育侯安都等敗於沌口為王琳所執武帝召陷賊諸子弟
厚遇之文季最有禮容深見賞文帝嗣位除宣惠始興王
府限內中直兵參軍累遷臨海太守後乘金翅助父鎮郢
城華皎平靈洗及文季並有扞禦之功及靈洗卒文季盡
領其衆起為超武將軍仍助防郢州文季性至孝雖軍旅
奪禮而毀瘠甚至服闋襲封重安縣公隨都督章昭達率

南史列傳五十一
六
軍往荊州征梁梁人與周軍多造舟艦置于青泥水中昭
達遣文季共錢道戢盡焚其舟艦既而周兵大出文季僅
以身免以功加通直散騎常侍大建五年都督吳明徹北
討至秦郡秦郡前江浦通涂水齊人並下大柱為柵水
中文季乃前領驍勇拔開其柵明徹率大軍自後而至攻
剋秦郡又別遣文季攻涇州屠其城進拔盱台仍隨明徹
圍壽陽文季臨事謹飭御下嚴整前後所克城壘率皆注
水為堰土木之功動踰數萬置陣役人文季必先於諸將
夜則早起迄暮不休軍中莫不服其勤幹每戰為前鋒齊
軍深憚之謂為程彪以功除散騎常侍帶新安內史累遷

北徐州刺史加都督後隨明徹北侵軍敗為周所囚仍授
開府儀同三司十一年自周逃歸至高陽為邊吏執送長
安死于獄是時既與周絕不之知至德元年後主知之贈
散騎常侍又詔傷其廢絕降封重安縣侯以子響龍襲封

沈恪字子恭吳興武康人也深沈有幹局梁新渝侯蕭映
之為廣州兼映府中兵參軍陳武帝與恪同郡情好甚昵
蕭映卒後武帝南討李贇仍遣妻子附恪還鄉尋補東宮
直後以嶺南勲除贇外散騎侍郎仍令摠集宗從子弟侯
景園臺城起東西二土山以逼城城內亦作土山應之恪
為東土山主晝夜拒戰以功封東興侯及城陷間行歸鄉

武帝討京遣使報恪恪於東起兵相應賊平後授都軍副
及武帝謀討王僧辯恪預其事武帝使文帝還長城立柵
備杜龕使恪還武康招集兵衆及僧辯誅龕果遣副將杜
泰襲文帝於長城恪時已出縣誅龕黨與武帝尋遣周文
育來援長城文育至泰乃走及龕平文帝龍襄東揚州刺史
張彪以恪監吳興郡武帝受禪時恪自吳興入朝武帝使
中書舍人劉師知引恪令勒兵入因衛敬帝如別宮恪排
闥入見武帝叩頭謝曰恪身經事蕭家來今日不忍見此
事分受死耳決不奉命武帝嘉其意不復逼更以盪主王
僧志代之帝踐祚除吳興太守永定三年除散騎常侍會

稽太守歷事文帝及廢帝累遷護軍將軍至宣帝即位除
平越中郎將都督廣州刺史恪未至嶺前刺史歐陽紇舉
兵拒嶮不得進朝廷遣司空章昭達討平紇乃得入州兵
荒之後所在殘毀恪綏懷安輯被以恩惠嶺表賴之後主
即位爲特進金紫光祿大夫卒謚曰光子法興嗣

陸子隆字興世吳郡人也祖敞之梁嘉興令父恢封氏令
子隆少慷慨有志功名侯景之亂於鄉里聚徒時張彪爲
吳郡太守引爲將帥仍隨彪徙鎮會稽及文帝討彪彪將
沈泰吳寶真申縉等皆降而子隆力戰敗績文帝義之復
使領其部曲文帝嗣位子隆力戰領甲仗宿衛封益陽縣

子累遷廬陵太守周迪據臨川反子隆隨章昭達討迪迪退走因隨昭達討陳寶應晉安平子隆功最遷武州刺史改封朝陽縣伯華皎據湘州反以子隆居其心腹皎深患之頻遣使招子隆不從攻又不剋及皎敗於郢州子隆出兵襲其後因與大軍相會進爵為侯尋遷都督荊州刺史荊州新置居公安城池未固子隆脩立城郭綏集夷夏其得人和號為稱職吏人詣闕求立碑頌美功績詔許之卒謚威子之武嗣之武年十六領其舊軍後為弘農太守乃隸吳明徹於呂梁軍敗逃歸為人所害子隆弟子亦信幹略從子隆征討有功除始平太守封始康縣子卒於信

州刺史

錢道戢字子誦吳興長城人也父景深梁漢壽令道戢少以老行著聞及長頗有材幹陳武帝微時以從妹妻焉武帝輔政道戢隨文帝平張彪于會稽以功拜東徐州刺史封永安縣侯天嘉元年為臨海太守侯安都之討留異道戢帥軍出松陽以斷其後異平以功拜都督衡州刺史領始興內史後與章昭達討歐陽紇紇平除左衛將軍太建二年又隨昭達征江陵以功加散騎常侍後為都督郢州刺史與儀同黃法範攻下歷陽因以道戢鎮之卒官謚曰肅子邈嗣

駱文牙字旗門吳興臨安人也父裕梁都陽嗣王中兵參
軍事牙年十二宗人有善相者云此郎容貌非常必將遠
致梁太清末陳文帝避地臨安文牙母陵觀帝儀表知非
常人賓待甚厚及帝為吳興太守引文牙為將帥從平杜
龕張彪勇冠衆軍文帝即位封臨安縣侯任越州刺史初
文牙母卒時兵荒至是始葬詔贈臨安國太夫人謚曰恭
太建八年文牙累遷散騎常侍入直殿省十年授豐州刺
史至德二年卒贈廣州刺史子義嗣

孫瑒字德璉吳郡長安人也父脩道梁中散大夫以雅素知
名瑒少倜儻好謀略博涉經史尤便書翰仕梁為邵陵王

中兵參軍事太清之難授假節宣猛將軍軍主王僧辯之
討侯景也王琳為前軍琳與瑒親婭乃表薦為官都太守
後以軍功封富陽侯敬帝立累遷巴州刺史及陳武帝受
禪王琳立梁永嘉王蕭莊於郢州徵瑒為少府卿仍徙都督
郢州刺史摠留府之任周遣太將軍史寧乘虛攻之瑒兵
不滿千人乘城拒守周兵不能剋及王琳乘勝而進周兵
乃解瑒於是盡有中流之地既而遣使奉表歸陳天嘉元
年授湘州刺史封定襄縣侯瑒懷不自安乃固請入朝徵
為侍中領軍將軍未拜文帝謂曰昔朱買臣願為本郡鄉
豈有意授乎改授吳郡太守給鼓吹一部秩滿徵拜散騎

常侍中護軍及留異反據東陽詔瑒督舟師進討異平遷
鎮右將軍瑒之出為建安太守太建四年為都督荊州刺
史出鎮公安為鄰境所憚居職六年以公事免及吳明徹
軍敗呂梁詔授都督緣江水陸諸軍事尋授都督郢州刺
史十二年坐疆場交通抵罪後主嗣位復爵邑歷位度支
尚書侍中祠部尚書後主頻幸其宅賦詩述勲德之美遷
五兵尚書領左軍將軍侍中如故禎明元年卒官謚曰桓
瑒事親以孝聞於諸弟甚篤睦性通泰有財散之親友居
家頗失於侈家庭穿築極林泉之致歌鍾舞女當世罕儔
賓客填門軒蓋不絕及出鎮郢州乃合十餘船為大舫於

中立亭池植荷芰每良辰美景賓僚並集泛長江而置酒
亦一時之勝賞焉常於山齋設講肆集玄儒之士冬夏資
奉為學者所稱而處已率易不以名位驕物時與皇寺朗
法師該通釋典瑒每造講筵時有抗論法侶莫不傾心又
巧思過人為起部尚書軍國器械多所創立有鑿識男女
婚姻皆擇素貴及卒尚書令江撝為之銘誌後主又題銘
後四十字遺左戶尚書蔡徵就宅宣讀讎之其詞曰秋風
動竹烟水驚波幾人樵徑何處山阿今時日月宿昔綺羅
天長路遠地久靈多功臣未勒此意如何時論以為榮瑒
二十一子第二子訓頗知名位高唐太守陳亡入隋

徐世譜字興宗巴東魚復人也世居荊州為主帥征伐蠻
蜒至世譜尤勇敢有旅力善水戰梁元帝之為荊州刺史
世譜將領鄉人事焉侯景之亂因預征討累遷至員外散
騎常侍尋領水軍從司徒陸法和與景戰於赤亭湖時景
軍甚盛世譜乃別造樓船拍艦火舫水車以益軍勢將戰
又乘大艦居前大敗景軍禽景將任約景退走因隨王僧
辯攻郢州世譜復乘大艦臨其倉門賊將宋子仙據城降
以功除信州刺史封魚復縣侯仍隨僧辯東下恒為軍鋒
景平以衡州刺史資領河東太守西魏攻荆門世譜鎮馬
頭岸據有龍洲元帝授侍中都督江南諸軍事鎮南將軍
護軍將軍魏剋江陵世譜東下依侯瑱紹泰元年徵為侍
中左衛將軍陳武帝之拒王琳其水戰之具悉委世譜世
譜性機巧諳解舊法所造器械並隨機損益妙思出人未
定二年遷護軍將軍文帝即位歷特進右光祿大夫以疾
失明謝病不朝卒謚曰桓

周敷字仲遠臨川人也為郡豪族敷形貌眇小如不勝衣
膽力勁果超出時輩性豪俠輕財重士鄉黨少年任氣者
咸歸之侯景之亂鄉人周續合眾以討賊為事梁內史始
興蕃王蕭毅以郡讓續續所部有欲侵掠毅者敷擁護之
親率其黨捍送至豫章時梁觀寧侯蕭永長樂侯蕭基豐

城侯蕭泰避難流寓聞敷信義皆往依之敷敗其危懼屈
體崇敬厚加給郵送之西上俄而續部下將帥爭權殺續
以降周迪迪素無簿關又失衆心倚敷族望深求交結敷
未能自固事迪甚恭迪大憑杖之迪據臨川之工塘敷鎮
臨川故郡侯景平梁元帝授敷寧州刺史封西豐縣侯陳
武帝受禪王琳據有上流余孝頃與琳黨李孝欽等共圍
周迪敷助於迪迪禽孝頃等敷功最多熊曇朗之殺周文
育據豫章將丘襲敷敷大破之曇朗走巴山郡敷因與周
迪黃法氈等進兵屠之王琳平授散騎常侍豫章太守時
南江酋帥並顧戀巢窟唯敷獨先入朝天嘉二年詣關進

號安西將軍令還鎮豫章周迪以敷素出已下超致顯達
深不平乃舉兵反遣弟方興襲敷敷大破之仍從都督吳
明徹攻破迪禽方興再遷都督南豫州刺史迪又收餘衆
襲東興文帝遣都督章昭達征迪敷又從軍至定川縣與
迪相對迪給敷求還朝欲立盟敷許之方登壇為迪所害
謚曰脫子智安嗣位至太僕卿

荀朗字深明潁川潁陰人也祖延祖梁潁川太守父伯通
衛尉卿朗少慷慨有將帥大略侯景之亂據巢湖無所屬
臺城陷沒後梁簡文帝密詔授朗豫州刺史令與外蕃討
景景使儀同朱子仙約等頻征之不能剋時都下饑朗

更招致部曲衆至數萬侯景敗於巴陵朗截破其後軍景
平後又別破齊將郭元建於踟躕山及魏剋荊州陳武帝
入輔齊遣蕭軌東方老等來寇據石頭朗自宣城來赴與
侯安都等大破之武帝受禪賜爵興寧縣侯以朗兄昂爲
左衛將軍弟晏爲太子左衛率武帝崩宣太后與舍人蔡
景歷秘不發喪朗弟曉在都微知之謀率其家兵襲臺事
覺景歷殺曉仍繫其兄弟文帝即位並釋之因厚撫朗令
與侯安都等拒王琳琳平遷都督合州刺史卒謚曰壯子
法尚嗣法尚少倣儻有文武幹略禎明中爲都督郢州刺
史及隋軍濟江法尚降入隋歷邵觀綿豐四州刺史巴東

敦煌二郡太守

周炅字文昭汝南安成人也祖強齊梁州刺史父靈起梁
廬桂二州刺史保城縣侯炅少豪俠任氣有將帥才梁太
清元年爲弋陽太守侯景之亂元帝承制改授西陽太守
封西陵縣伯以軍功累遷都督江州刺史進爲侯陳武帝
踐祚王琳擁據上流炅以州從之後爲侯安都所禽送都
文帝釋之授定州刺史帶西陽武昌二郡太守太建五年
爲都督安州刺史改封龍源縣侯其年隨都督吳明徹北
討所向剋捷一月之中獲十二城敗齊尚書左丞陸騫軍
進攻巴州剋之於是江北諸城及穀陽土人並誅其渠帥

以城降進號和戎將軍仍敕追良入朝後梁定州刺史田龍昇以城降詔以為定州刺史封赤亭王及昇入朝龍昇以江北六州七鎮叛入于齊齊遣歷陽王高景安應之於是令昇為江北道大都督摠統眾軍以討龍昇斬之盡復江北之地進號平北將軍卒於官贈司州刺史改封武昌郡公謚曰壯

魯悉達字志通扶風郿人也祖斐齊衡州刺史陽塘侯父益之梁雲麾將軍新蔡義陽二郡太守悉達幼以孝聞侯景之亂糾合鄉人保新蔡力田蓄穀時兵荒都下及上川餓死者十八九有得存者皆攜老幼以歸焉悉達所濟活

者甚眾招集晉熙等三部盡有其地使其弟廣達領兵隨王僧辯討平侯景梁元帝授北江州刺史敬帝即位王琳據有上流留異余孝頃周迪等所在蜂起悉達撫綏五郡甚得人和琳授悉達鎮北將軍陳武帝亦遣趙知禮授征西將軍江州刺史悉達兩受之遷延顧望武帝遣安西將軍沈泰潛師龍衣之不能剋齊遣行臺慕容紹宗來攻鬱口諸鎮悉達與戰大敗齊軍紹宗僅以身免王琳欲圖東下以悉達制其中流遣使招誘悉達終不從琳不得下乃連結於齊齊遣清河王高岳助之會裨將梅天養等懼罪乃引齊軍入城悉達勒麾下數千人濟江而歸武帝帝見之

喜曰來何遲也授北江州刺史彭澤縣侯悉達雖杖氣任
俠不以富貴驕人雅好詞賦招禮賢才與之賞會文帝即
位遷吳州刺史遭母憂哀毀過禮因遘疾卒謚孝侯子覽
嗣弟廣達

廣達字徧覽少慷慨志立功名虛心愛士賓客自遠而至
時江表將帥各領部曲動以千數而魯氏尤爲多仕梁爲
平南當陽公府中兵參軍侯景之亂與兄悉達聚衆保新
蔡梁元帝承制授晉州刺史王僧辯之討侯景廣達出境
候接資奉軍儲僧辯謂沈炯曰魯晉州亦是王師東道主
人仍率衆隨僧辯長平加員外散騎常侍陳武受禪授東

海太守後代兄悉達爲吳州刺史封中宿縣侯光大元年
遷南豫州刺史華皎稱兵上流詔司空淳于量進討軍至
夏口見皎舟師強盛莫敢進廣達首率驍勇直衝賊軍廣
達憤水沈溺久之因救獲免皎平授巴州刺史太建初與
儀同章昭達入峽口招定安蜀等諸州鎮時周圍江左大
造舟艦於蜀并運糧青泥廣達與錢道戢等將兵掩龍巖
火林之仍還本鎮廣達爲政簡要推誠任下吏人便之及
秩滿皆詣闕表請於是詔申二年衆軍北伐略淮南舊地
廣達與齊軍曾於六峴大破之斬其數城主張元範進剋
北徐州仍授北徐州刺史十年授都督合州刺史十一年

周將梁士彥圍壽春詔遣中領軍樊毅左衛將軍任忠等
分部趣陽平秦郡廣達率衆入淮爲掎角以擊之周軍攻
陷豫霍二州南北充晉等各自拔諸將並無功盡失淮南
之地廣達因免官以候還第十二年與南豫州刺史樊毅
比討剋鄆默城尋授平西將軍都督郢州以上七州諸軍
事領兵江夏周安州總管元景征江外廣達命偏師擊走
之至德二年爲侍中改封絳越郡公尋爲中領軍及賀若
弼進軍鍾山廣達於白土岡置陣與弼旗鼓相對廣達躬
擐甲胄手執桴鼓率勵敢死而進隋軍退走如是者數四
及弼乘勝至宮城燒北掖門廣達猶督餘兵苦戰不息會

日暮乃解甲面臺再拜慟哭謂衆曰我身不能救國負罪
深矣士卒皆涕泣歔歔於是就執復明二年依例入隋廣
達追愴本朝淪覆遭疾不瘳尋以憤慨卒尚書令江總撫
柩慟哭乃命筆題其棺頭爲詩曰黃泉雖抱恨白日自留
名悲君感義死不作負恩生又製廣達墓銘述其忠槩初
隋將韓擒之濟江廣達長子世真在新蔡乃與其弟世雄
及所部奔擒擒遣使致書招廣達廣達時屯兵都下乃自
劾延尉請罪後主謂曰世真雖異路中大夫公國之重臣
吾所恃賴豈得自同嫌疑之間乎加賜黃金即日還營廣
達有隊主楊孝辯時從廣達在軍中力戰陷陣其子亦隨

孝辯揮刀殺隋兵十餘人，力窮父子俱死。

蕭摩訶字元胤，蘭陵人也。父諒，梁始興郡丞。摩訶隨父之郡，年數歲而父卒。其姊夫蔡路養時在南康，乃收養之。稍長，果毅有勇力。侯景之亂，陳武帝赴援建鄴，路養起兵拒。武帝摩訶時年十三，單騎出戰，軍中莫有當者。及路養敗，摩訶歸侯安都，常從征討。安都遇之甚厚，及任約徐嗣徽，引齊兵為寇。武帝遣安都北拒齊軍於鍾山龍尾及北郊壇安都，謂摩訶曰：「卿驍勇有名，千聞不如一見。」摩訶對曰：「今日令公見之。」及戰，安都墜馬被圍，摩訶獨騎大呼直衝齊軍，齊軍稍解去。安都乃免，以平留異、歐陽紇功累遷巴

山太守。太建五年，衆軍北伐，摩訶隨都督吳明徹濟江攻秦郡。時齊遣大將尉破胡等率衆十萬來援，其前隊有蒼頭犀角大力之號，皆身長八尺，臂力絕倫，其鋒甚銳。又有西域胡妙於弓矢，弦無虛發。衆軍尤憚之。及將戰，明徹謂摩訶曰：「若殪此胡，則彼軍奪氣。君有關張之名，可斬顏良矣。」摩訶曰：「願得識其形狀，明徹乃召降人有識胡者云：胡絳衣，檉皮裝弓，兩端骨弭，明徹遣人覘伺。知胡在陣，仍自酌酒飲摩訶。摩訶飲訖，馳馬衝齊軍，胡挺身出陣前，十餘步，殼弓未發。摩訶遙擲銃，錮正中其額，應手而仆。齊軍大力十餘人出戰，摩訶又斬之。於是齊師退走，以功封康平

縣伯尋進為侯位太僕卿又隨明徹進圍宿豫擊走齊將
王康德以功除晉熙太守九年明徹進軍呂梁與齊大戰
摩訶率七騎先入手奪齊軍大旗齊衆大潰以功授燕州
刺史及周武帝滅齊遣其將宇文忻爭呂梁忻時有精騎
數千摩訶領十二騎深入周軍從橫奮擊斬馘甚衆及周
遣大將王軌來赴結長圍連鑊於呂梁下流斷大軍還路
摩訶謂明徹曰聞軌始鑊下流其兩頭築城今尚未立公
若見遣擊之彼必不敢相拒彼城若立則吾屬虜矣明徹
奮髯曰塞旗陷陣將軍事也長筭遠略老夫事也摩訶失
色而退旬之中水路遂斷周兵益至摩訶又誥曰今求

戰不得進退無路若潛軍突圍未足為耻願公率步卒乘
馬輿徐行摩訶驅馳前後必使公安達京邑明徹曰果計
乃良圖也然老夫受服專征今被圍逼慙實無地且步軍
既多吾為搃督必須身居其後相率兼行弟馬軍宜須在
前摩訶因夜發選精騎八千率先衝突自後衆騎繼焉比
旦達淮南宣帝徵還授右衛將軍及宣帝崩始興王叔陵
於殿方手刃後主遂奔東府城摩訶入受敕乃率馬步數
百趣東府城斬之以功授車騎大將軍封綏建郡公叔陵
素所蓄聚金帛累巨萬後主悉以賜之改授侍中驃騎大
將軍左光祿大夫舊制三公黃閣聽事置鴟尾後主特詔

摩訶開黃閣門施行馬聽事寢堂並置鷓尾仍以其女爲
皇太子妃會隋摠管賀若弼鎮廣陵後主委摩訶禦之授
南徐州刺史禎明三年元會徵摩訶還朝弼乘虛濟江襲
京口摩訶請率兵逆戰後主不許及弼進鍾山摩訶又曰
弼懸軍深入壘漸未堅出兵掩襲必剋又不許及將出戰
後主謂曰公可爲我一決摩訶曰從來行陣爲國爲身今
日之事兼爲妻子後主多出金帛賦諸軍以充賞賜令中
領軍魯廣達陳兵白土岡居衆軍南鎮東大將軍任忠次
之護軍將軍樊毅都官尚書孔範又次之摩訶軍最居北
衆軍南北亘二十里首尾進退不相知弼初謂未戰將輕

騎登山望見衆軍因馳下置陣後主通於摩訶之妻故摩
訶雖領勁兵八千初無戰意唯魚廣達田端以其徒力戰
賀若弼及所部行軍七摠管楊牙韓洪貞明黃昕張默言
達奚隆張辯等甲士凡八千各各勒陣以待之弼躬當魯
廣達麾下戰死者二百七十三人弼縱煙以自隱窘而復
振陳兵得人頭皆走獻後主求賞金銀弼更趣孔範範兵
暫交便敗走陳軍盡潰死者五千人諸門衛皆走黃昕馳
燒北掖門而入貞明禽摩訶以送弼弼以刀臨頸詞色不
撓乃釋而禮之及城平弼置後主於德教殿令兵衛守摩
訶請弼曰今爲囚虜命在斯須願一見舊主死無所恨弼

哀而許之入見後主俯伏號泣仍於舊厨取食進之辭訣
而出守衛者皆不能仰視隋文帝聞摩訶抗荅賀若弼曰
壯士也此亦人之所難入隋授開府儀同三司尋從漢王
諒詣并州同諒作逆伏誅年七十三摩訶訥於言恂恂長
者至於臨戎對寇志氣奮發所向無前年未弱冠隨侯安
都在京口性好獵無日不畋游及安都征伐摩訶功居多
子世廉有父風性至孝及摩訶凶終服闋後追慕彌切其
父時賓故脫有所言及世廉對之哀慟不自勝言者為之
歔歔終身不執刀斧時人嘉焉摩訶有騎士陳智深者勇
力過人以平叔陵功為巴陵內史摩訶之戮也其子先已
籍沒智深收摩訶屍手自殯斂哀感行路君子義之潁川
陳禹亦隨摩訶征討聰敏有識量涉獵經史解風角兵書
頗能屬文便騎射官至王府諮議

任忠字奉誠小名蠻奴汝陰人也少孤微不為鄉黨所齒
及長譎詭多計略旅力過人尤善騎射州里少年皆附之
梁都陽王蕭範為合州刺史聞其名引置左右侯景之亂
忠率鄉黨數百人隨晉熙太守梅伯龍討景將王貴顯於
壽春每戰却敵會士人胡通聚眾寇抄軌命忠與主帥梅
思立并軍討平之仍隨範世子嗣率眾入援會京城陷旋
戍晉熙侯景平授蕩寇將軍王琳立蕭莊署忠為巴陵太

守琳敗還朝授明毅將軍安湘太守仍隨侯瑱進討巴湘
累遷豫寧太守衡陽內史華皎之舉兵也忠預其謀及皎
平宣帝以忠先有密啓於朝廷釋而不問太建初隨章昭
達討歐陽紇於廣州以功授直閣將軍遷武毅將軍廬陵
內史秩滿入爲右軍將軍五年衆軍北伐忠將出西道擊
走齊歷陽王高景安於大峴遂北至東關仍剋其東西二
城進軍蘄譙竝拔之徑襲合肥入其郛進剋霍州以功授
負外散騎常侍封安復縣侯呂梁之喪師也忠全軍而還
尋授忠都督壽陽新蔡霍州緣淮衆軍霍州刺史入爲左
衛將軍遷平南將軍南豫州刺史加都督率步騎趣歷陽

周遣王延貴率衆爲援忠大破之生禽延貴後主嗣位
號鎮南將軍給鼓吹一部入爲領軍將軍加侍中改封梁
信郡公出爲吳興內史及隋兵濟江忠自吳興入走屯寧
朱雀門後主召蕭摩訶以下於內殿定議忠曰兵法客貴
速戰主貴持重今國家足食足兵宜固守臺城緣淮立柵
北軍雖來勿與交戰分兵斷江路無令彼信得通給臣精
兵一萬金翅三百艘下江徑掩六合彼大軍必言其度江
將士已被獲自然挫氣淮南土人與臣舊相知悉今聞臣
往必皆景從臣復揚聲欲往徐州斷彼歸路則諸軍不擊
而自去待春水長上江周羅暉等衆軍必沿流赴援此良

計矣後主不能從明日欬然曰腹煩殺人喚蕭郎作一打
忠叩頭苦請勿戰後主從孔範言乃戰於是據白土岡陳
及軍敗忠馳入臺見後主言敗狀曰官好住無所用力後
主與之金兩膝為我南岸收募人猶可一戰忠曰陛下唯
當具舟楫就上流聚軍臣以死奉衛後主信之敕忠出部
分忠辭云臣願分訖即奉迎後主令宮人裝束以待忠久
望不至時隋將韓擒自新林進軍忠率數騎往石子岡降
之仍引擒軍共入南掖門臺城平入長安隋授開府儀同
三司卒年七十七隋文帝後以散騎常侍袁元友能直言
於後主嘉之擢拜主爵侍郎請羣臣曰平陳之初誠悔不

殺任蠻奴受人榮祿兼當重寄不能撲屣云無所用力與
弘演納肝何其遠也子幼武位儀同三司

樊毅字智烈南陽湖陽人也祖方興梁散騎常侍司州刺
史魚復縣侯父文熾梁散騎常侍東益州刺史新蔡縣侯
毅家本將門少習武善騎射侯景之亂率部曲隨叔父文
皎援臺城文皎於青溪戰歿毅赴江陵仍隸王僧辯討河
東王蕭譽以功除右中郎將代兄俊為梁興太守領三州
游軍隨宜豐侯蕭循討陸納於湘州軍次巴陵營頓未立
納潛軍夜至薄營大譟軍中將士皆驚擾毅獨與左右數
十人當營門力戰斬十餘級擊鼓申令眾乃定焉以功封

夷道縣伯尋除天門太守進爵為侯及西魏圍江陵毅率
郡兵赴援會魏剋江陵為後梁所俘久之遁歸陳武帝受
禪毅與弟猛舉兵應王琳琳敗奔齊大尉侯瑱遣使招毅
毅率子弟部曲還朝大建初為豐州刺史封高昌縣侯入
為左衛將軍五年衆軍北伐毅攻廣陵楚子城拔之擊走
齊軍及呂梁喪師詔以毅為大都督率衆度淮對清口築
城與周人相抗霖兩城壞毅全軍自拔尋遷中領軍十一
年周將梁士彥圍壽陽詔以毅為都督北討前軍事十三
年為荊州刺史後主即位改封逍遙郡公入為侍中護軍
將軍及隋軍濟江毅謂僕射袁憲曰京口采石俱是要所

各須銳卒數千金翅二百都下江中上下防捍如其不然
大事去矣諸將咸從其議會施文慶等寢隋兵消息毅計
不行臺城平隨例入關卒毅弟猛字智武幼儻有幹略
及長便弓馬膽氣過人青溪之戰猛自旦訖暮與侯景軍
短兵接戰殺傷甚衆臺城平隨兄毅西上梁南安侯方矩
為湘州刺史以猛為司馬會武陵王紀舉兵自漢江東下
方矩遣猛隨都督陸法和進軍拒之猛手禽紀父子三人
斬於船中盡收其船糧器械以功封安山縣伯進軍撫定
梁益還遷司州刺史進爵為侯陳永定元年周文育等敗
於沌口為王琳所獲琳棄展將事南中諸郡遣猛與李孝

欽等將兵攻豫章進逼周迪軍敗為迪所執尋遁歸王琳琳敗還朝天嘉二年授永陽太守太建中以軍功封富川縣侯歷散騎常侍荊州刺史入為左衛將軍後主即位為南豫州刺史隋將韓擒之濟江猛在都下第六子巡攝行州事擒進軍攻陷之巡及家口竝見執時猛與左衛將軍蔣元遜領青龍八十艘為水軍於白下游奔以禦隋六合兵後主知猛妻子在隋懼有異志欲使任忠代之令蕭摩訶徐喻毅毅不悅摩訶以聞後主雷傷其意乃止禎明三年入隋

論曰梁氏云李運屬雲雷陳武帝以旗掃難經綸伊始胡穎徐度杜稜周鐵武程靈洗等咸感會風雲畢力驅馳之日或擢自降附乃贊興王之始咸得配享清廟豈徒然哉沈恪行已之方不踐非義之迹子隆持身之節無失事人之道仁矢乎錢道戢駱文牙孫瑒徐譜周敷荀朗周炅魯悉達廣達蕭摩訶任忠樊毅等所以獲用當年其道雖異至於功名自立亦各因時當金陵覆沒抑惟天數然任忠與亡之義無乃致虧與夫蕭魯所行固不同且持此百心而事二主欲求取信不亦難乎首領獲全亦為幸也

列傳第五十八

南史六十八

李

延壽

趙知禮

蔡景歷子儉

宗元饒

韓子高

華皎

劉師知

謝岐

毛喜

沈君理

陸山才

趙知禮字齊旦天水隴西人也父孝穆梁候官令知禮涉獵文史善書翰梁武帝之討元景仲也或薦之引為書記知禮為文瞻遠每占授軍書下筆便就率皆稱旨由是恒待左右深被委任當時計畫莫不預焉武帝征侯景至白

茅濟上表於梁元帝及與王僧辯論軍事其文並知禮所
製及景平授中書侍郎封始平縣子陳受命位散騎常侍
太府卿權知領軍事天嘉元年進爵為伯王琳平授吳州
刺史知禮沈靜有謀謨每軍國大事文帝輒令璽書問之
再遷右將軍領前軍將軍卒贈侍中謚曰忠子元恭嗣
蔡景歷字茂世濟陽考城人也祖點梁尚書左戶侍郎父
大同輕車岳陽王記室參軍景歷少俊爽有孝行家貧好
學善尺牘工草隸為海陽令政有能名在侯景中與南康
嗣王會理通謀匡復事泄被執賊黨王偉保護之獲免因
居游京口侯景平後武帝鎮朱方素聞其名以書要之景

歷對使人荅書筆不停輟文無所改帝得書甚加欽賞即
日授征北府中記室參軍仍領記室衡陽獻王昌為吳興
太守帝以鄉里父老尊卑有數恐昌年少接對乖禮乃遣
景歷輔之承聖中還掌記室武帝將討王僧辯獨與侯安
都等數人謀之景歷弗之知部分既畢召令草檄景歷援
筆立成辭義感激事皆稱旨及受禪遷秘書監中書通事
舍人掌詔詰永定二年坐妻弟受周寶安餉馬為御史中
丞沈炯所劾降為中書侍郎舍人如故三年武帝崩時外
有強寇文帝鎮南皖朝無重臣皇后呼景歷及江大權社
稷定議秘不發喪疾召文帝景歷躬共宦者及內人密營

敘服時既暑熱須營梓宮恐斤斧之聲聞外乃以蠟為祕器文詔依舊宣行文帝即位復為祕書監舍人如故以定策功封新豐縣子累遷散騎常侍文帝誅侯安都景歷勸成其事以功遷太子左衛率進爵為侯常侍舍人如故坐妻兄劉裕依倚景歷權前後姦詭并受歐陽威餉絹百匹免官華皎反以景歷為武勝將軍吳明徹軍司敗平明徹於軍中輒戮安成內史楊文通又受降人馬仗有不明景歷又坐不能匡正被收久之獲宥宣帝即位累遷通直散騎常侍中書通事舍人掌詔誥仍復封邑太建五年都督吳明徹北侵所向剋捷大破周梁士彥於呂梁方進圍

彭城時宣帝銳意河南以為指麾可定景歷稱師老將驕不宜過窮遠略帝惡其沮眾大怒猶以朝廷舊臣不加深罪出為豫章內史未行為飛章所劾以在省之日賦污狼籍帝令有司案問景歷但承其半於是御史中丞宗元饒奏免景歷所居官徙居會稽及吳明徹敗帝追憶景歷前言即日追還以為征南都陽王諮議數日遷貞外散騎常侍兼御史中丞復本爵封入守度支尚書舊式拜官在午後景歷拜日適逢輿駕幸玄武觀在位皆侍宴帝恐景歷不預特令早拜其見重如此卒官贈太常卿諡曰敬十二年改葬重贈中領軍禎明元年配享武帝廟庭二年車駕

親幸其宅重贈良券待中中撫軍將軍謚曰忠敬給鼓吹
一部於墓所立碑景歷屬文不尚雕靡而長於叙事應機
敏速為當時所稱有文集三十卷子徵嗣江大權字伯謀
濟陽考城人位少府封四會縣伯太建二年卒於通直散
騎常侍

徵字希祥幼聰敏精識強記年六歲詣梁吏部尚書河南
褚翔嗟其穎悟七歲丁母憂居喪如成人禮繼母劉氏性
悍忌親之不以道徵供侍益謹初無怨色徵本名覽景歷
以其有王祥之性更名字焉陳武帝為南徐州召補迎主
簿尋授太學博士太建中累遷太子中舍人兼東宮領直

襲封新豐侯至德中位太子中庶子中書舍人掌詔誥尋
授左戶尚書與僕射江惣知撰五禮事後主器其才幹任
寄日重遷吏部尚書母十日一往東宮於皇太子前論述
古今得喪及當時政務又敕以廷尉寺獄事無大小取徵
議決俄敕遣徵收募兵士自為部曲徵善撫卹得物情旬
月之間眾近一萬位望既重兼聲位重灼物議咸忌憚之
尋徙中書令中書清簡無事或云徵有怨言後主聞之大
怒收奪人馬將誅之左右致諫獲免禎明二年隋軍濟江
後主以徵有幹用令權知中領軍事徵日夜勤苦備盡心
力後主嘉焉謂曰事寧有以相報及決戰於鍾山南岡敕

徵守宮城西北大營尋令督衆軍戰事陳亡隨例入長安
徵美容儀有口辯多所詳究至於士流官宦陳宗戚屬及
當朝制度憲章儀軌戶口風俗山川土地問無不對然性
頗便佞進取不能以遠素自業初拜吏部尚書啓後主借
鼓吹後主謂所司曰鼓吹軍樂有功乃授蔡徵不自量揆
紊我朝章然其父景歷既有締構之功宜且加啓拜訖即
進還徵不脩康隅皆此類也隋文帝聞其敏賢召見顧問
言輒會言然累年不調父之除太常丞歷尚書戶部儀曹
郎轉給事郎卒子翼位司徒屬入隋爲東宮學士
宗元饒南郡江陵人也少好學以孝聞仕梁爲征南府外

兵參軍及司徒王僧辯幕府初建元饒與沛國劉師知同
爲主簿陳武帝受禪稍遷廷尉卿尚書左丞宣帝初軍國
務廣事無巨細一以貫之臺省號爲稱職遷御史中丞知
五禮事時合州刺史陳襄贓污狼籍遣使就渚斂魚又令
人於六郡乞米百姓甚苦之元饒劾奏免之吳興太守武
陵王伯禮豫章內史南康嗣王方泰等驕蹇放橫元饒案
奏皆見削黜元饒性公平善持法諳曉故事明練政體吏
有犯法政不便時及於名教不足者隨事糾正多所裨益
遷南康內史以秩米三千餘斛助人租課存問高年拯救
乏絕百姓甚賴焉以課最入朝詔加散騎常侍後爲吏部

尚書卒

韓子高，會稽山陰人也。家本微賤，侯景之亂，寓都下。景平，陳文帝出守吳興，年十六，為摠角，容貌美麗，狀似婦人。於淮渚，附部伍寄載，欲還鄉里。文帝見而問曰：「能事我乎？」子高許諾。子高本名蛮，子帝改名之。性恭謹，恒執備身刀及傳酒。帝性急，子高恒會意，言稍長，習騎射，頗有膽決，願為將帥。及平杜龕，配以士卒，文帝甚愛之，未嘗離左右。帝嘗夢騎馬登山，路危欲墮，子高推捧而升。文帝之討張彪也，沈泰等先降，帝據有州城，周文育鎮北郭香巖寺，張彪自剡縣夜還，襲城，文帝自北門出，倉卒聞之，軍人擾

亂，唯子高在側。文帝乃遣子高自亂兵中往見文育，反命酬答於閭中，又往慰勞衆事。文帝散兵稍集，子高引入文育營，因共立柵。明日，敗彪，彪奔松山。浙東平，文帝乃分麾下多配子高。子高亦輕財，禮士歸之者甚衆。文帝嗣位，除右軍將軍，封文招縣子。及王琳平，子高所統益多。將士依附之，其有所論，進帝皆任使焉。天嘉六年，為右衛將軍。文帝不豫，入侍醫藥。廢帝即位，加散騎常侍。宣帝入輔，子高兵權過重，深不自安，好參訪臺閣，又求出為衡廣諸鎮。光大元年八月，前上虞縣令陸昉及子高軍主告其謀反。宣帝在尚書省，因召文武在位議，立皇太子。子高預焉，執送

廷尉其少與到仲舉同賜死父延慶及子弟並原宥

華皎晉陵既陽人也世爲小史皎梁代爲尚書比部令史

侯景之亂事景之黨王偉陳武帝南下文帝爲景所囚皎

遇文帝甚厚及景平文帝爲吳興太守以皎爲都錄事深

見委任及文帝平杜龕仍配以甲兵御下分明善於撫接

解衣推食多少必均天嘉元年封懷仁縣伯王琳東下皎

隨侯瑱拒之琳平知江州事後隨都督吳明徹征周迪迪

平以功進爵爲侯仍授都督湘州刺史皎起自下吏善營

產業又征川洞多致銅鼓及生口並送都下廢帝即位改

封重安縣公韓子高誅後皎內不自安光大元年密啓求

廣州以觀省主意宣帝偽許之而詔書未出皎亦遣使引

周兵又崇奉梁明帝士馬甚盛詔乃以吳明徹爲湘州刺

史實欲以輕兵襲之慮皎先發乃前遣明徹率衆三萬乘

金翅直趣郢州又遣撫軍大將淳于量率衆五萬乘大

艦繼之時梁明帝遣水軍爲皎聲援周武帝遣衛公宇文

直頓魯山又遣柱國長湖公元定攻圍郢州梁明帝授皎

司空巴州刺史戴僧朔衛陽內史任蠻奴巴陵內史潘智

虔岳陽太守章昭裕桂陽太守曹宣湘東太守錢明並隸

於皎又長沙太守曹慶等本隸皎下因爲之用帝恐上流

宰守並爲皎扇惑乃下詔曲赦湘巴二州其賊主帥節將

並許開恩出首皎以大艦載新因風放火俄而風轉自焚
皎大敗乃與戴僧朔奔江陵元定等無復舡度步趣巴陵
巴陵城已為陳軍所據及降送于建鄴皎遂終於江陵其
黨並誅唯任蠻奴章昭裕曹宣劉廣業獲免

劉師知滯國相人也家本素族祖奚之齊淮南太守以善
政聞父景彦梁司農卿師知本名師智以與敬帝諱同改
焉好學有當務才博涉書傳工文筆善儀體臺閣故事多
所詳悉紹泰初陳武帝入輔以師知為中書舍人掌詔誥
省兵亂後朝儀多闕武帝為丞相及加九錫并受禪其儀
注多師知所定梁敬帝在內殿師知常侍左右及將加害

師知詐帝令出帝覺避牀走曰師知賣我陳霸先反我本
不須作天子何意見殺師知執帝衣行事者加刃焉既而
報陳武帝曰事已了武帝曰卿乃忠於我後莫復爾師知
不對武帝受命仍兼舍人性疎簡與物多忤雖位官不遷
而任遇甚重其所獻替皆有弘益及武帝崩六日成服時
朝臣共議大行皇帝靈坐俠御人衣服吉凶之制博士沈
文阿議宜服吉師知議云既稱成服本備喪禮案梁昭明
太子薨成服俠侍之官悉著衰斬唯著鎧不異此即可擬
愚謂六日成服俠靈坐須服衰經中書舍人蔡昱歷江德
藻謝岐等同師知議時以二議不同乃啓取左丞徐陵決

斷陵云案山陵鹵簿吉部伍中公卿以下導引者爰及武
賁鼓吹執蓋奉車並是吉服豈容俠御獨爲衰經若言公
卿胥吏並服衰經此與梓宮部傳有何差別若言文物並
吉司事者豈豈容衽經而奉華蓋衰衣而升玉路邪同博
士議謝歧議曰靈筵祔宗廟梓宮還山陵實如左丞議但
山陵鹵簿備有吉凶從靈輿者儀服無變從梓宮者皆服
苴衰爰至士禮悉同此制此自是山陵之儀非闕成服今
謂梓宮靈柩共在西階稱爲成服亦無鹵簿直是爰自胥
吏上至王公四海之內必備衰經案梁昭明太子薨略是
成例豈容凡百士庶悉此日服重而侍中至於武衛最是

近官反鳴玉紆青與平吉不異左丞既推以山陵事愚意
或謂與成服有殊陵重甚云老病屬纊不能多說古人爭
議多成怨府傳玄見尤於晉代王商取陷於漢朝謹自三
緘敬同高命若萬一不死猶得展言庶與羣賢更申揚權
丈阿猶執所見衆議不能決乃具錄二議奏聞上從師知
議遷馮臚卿舍人如故天嘉元年坐事免尋起爲中書舍
人復掌詔誥天康元年文帝不豫師知與尚書僕射到仲
舉等入侍醫藥帝崩豫顧命宣帝入輔師知與仲舉等遣
舍人殷不佞矯詔令宣帝還府事覺於北獄賜死初文帝
敕師知撰起居注自永定二年秋至天嘉元年爲十卷

謝歧會稽山陰人也父達梁太學博士歧少機警好學仕
梁為山陰令侯景亂流寓東陽景平依于張彪彪在吳郡
及會稽庶事委之彪每征討怕留歧監郡知後事彪敗陳
武帝引參機密為兼尚書右丞時軍旅屢興糧儲多闕歧
所在幹理深被知遇永定元年為給事黃門侍郎中書舍
人兼右丞如故天嘉二年卒贈通直散騎常侍弟嶠篤孝
為通儒

毛喜字伯武柴陽武人也祖稱梁散騎侍郎父栖忠中
權司馬喜少好學善草隸陳武帝素知之及鎮京口命喜
與宣帝往江陵仍敕宣帝諮稟之及梁元帝即位以宣帝

為領直喜為尚書功論侍郎及魏平江陵喜與宣帝俱還
長安文帝即位喜自周還進和好之策陳朝乃遣周弘正
等通聘及宣帝反國又遣喜入周以家屬為請周家宰字
文護執喜子曰能結二國之好者卿也仍迎柳皇后及後
主還天嘉三年至都宣帝時為驃騎將軍仍以喜為府諮
議參軍領中記室府朝文翰皆喜詞也文帝嘗謂宣帝曰
我諸子皆以伯為名汝諸子宜用叔為稱宣帝以訪喜喜
即條自古名賢杜叔英虞叔卿等二十餘人以啓之文帝
稱善文帝崩廢帝沖昧宣帝錄尚書輔政僕射到仲舉等
矯太后令遣宣帝還東府當時疑懼無敢厝言喜即馳入

謂宣帝曰今日之言必非太后之意宗社至重願加三思
竟如其策右衛將軍韓子高始與仲舉通謀其事未發喜
謂宣帝曰且簡人馬配與子高并賜鐵炭使脩器甲宣帝
曰子高即欲收執何更如是喜曰山陵始畢邊寇尚多而
子高受委前朝名爲杖順宜推心安誘使不自疑圖之一
壯士之力耳宣帝卒行其計及帝即位除給事黃門侍郎
兼中書舍又典軍國機密宣帝議北侵敕喜撰軍制十三
條詔頒天下文多不載論定策功封東昌縣侯以太子右
衛率右將軍行江夏武陵桂陽三王府國事母憂去職詔
封喜母庾氏東昌國太夫人遣負外散騎常侍杜緬圖其
墓田上親與緬案圖指畫其見重如此歷位御史中丞五
兵尚書參掌選事及得淮南之地喜陳安邊之術宣帝納
之即日施行帝又欲進兵彭汴以問喜喜以爲淮左新平
邊人未輯周氏始吞齊國難與爭鋒未若安人保境斯久
長之術也上不從吳明徹卒俾于周喜後歷丹陽尹吏部
尚書及宣帝崩辰陵構逆敕中庶子陸瓊宣旨令南北諸
軍皆取喜處分賊平加侍中初宣帝委政於喜喜數有諫
爭事並見從自明徹敗後帝深悔不用其言謂袁憲曰一
不用喜計遂令至此由是益見親重喜乃言無回避時皇
太子好酒德每共親幸人爲長夜之宴喜嘗言之宣帝太

子遂銜之即位後稍見踈遠及被始興王傷創愈置酒引
江摠以下展樂賦詩醉酣而命喜早時山陵初畢未及踰
年喜見之不懌欲諫而後主已醉喜言心疾仆于階下移
出省中後主醒乃謂江摠曰我悔召毛喜知其無病但欲
阻我懽宴非我所為耳乃與司馬申謀曰此人力負氣吾欲
將乞郟陽兄弟聽其報讎可乎對曰終不為官用願如聖
旨傳綽爭之曰若許報讎欲置先皇何地後主曰當與一
小郡勿令見人事耳至德元年授永嘉內史喜至郡不受
奉秩政弘清靜人吏安之遇豐州刺史章大寶舉兵反郡
與豐州接而素無備喜乃脩城隍器械又遣兵援建安賊

平授南安內史禎明元年徵為光祿大夫領左驍騎將軍
道卒有集十卷子處冲嗣

沈君理字仲倫吳興人也祖僧粲梁左戶尚書巡元帝
時位少府卿魏平荊州梁宣帝署金紫光祿大夫君理美
風儀博涉有識鑒陳武帝鎮南徐州巡遣君理致謁深見
器重命尚會稽長公主及帝受禪拜駙馬都尉封永安亭
侯為吳郡太守時兵革未寧百姓荒弊君理摠集士卒脩
飾器械深以幹理見稱文帝嗣位累遷左戶尚書天嘉六
年為東陽太守天康元年以父憂去職自請往荊州迎柩
朝議以在位重臣難令出境乃遣長兄君嚴往焉及還將

蔡詔贈巡侍中領軍將軍謚曰敬子太建中歷位太子詹
事吏部尚書宣帝以君理女爲皇太子妃賜爵望奉爵侯
位侍中尚書右僕射卒贈翊左將軍開府儀同三司謚曰
貞憲君理弟君高君公君高字季高少知名性剛直有吏
能位衛尉卿平越中郎將都督廣州刺史甚得人和卒謚
祁子君公自梁元帝敗後常在江陵禎明中與蕭瓌蕭
巖叛隋歸陳後主擢爲太子詹事君公博學有才辯善談
論後主深器之陳亡入隋文帝以其叛亡命斬于建康君
理弟叔邁亦方正有幹局位通直散騎常侍侍東宮
陸山才字孔章吳郡吳人也祖翁寶梁尚書水部郎父汎

中散大夫山才倜儻好尚文史范陽張績績弟縉並欽重
之紹泰中都督周文育出鎮南豫州不知書疏以山才爲
長史政事悉以委之文育南討剋蕭勃禽歐陽顓計畫悉
出山才後文育重鎮豫章金口山才復爲鎮南長史豫章
太守文育爲熊曇朗所害曇朗囚山才等送于王琳未至
而侯安都敗琳將常衆愛由是山才獲反累遷度支尚書
坐侍宴與蔡景歷言語過差爲有司所奏免官尋授散騎
常侍遷西陽武昌二郡太守卒謚曰簡子

論曰趙知禮蔡景歷屬陳武經綸之日居文房書記之任
此乃宋齊之初傅亮王儉之職若乃較其才用理不同矣

而卒能膺務濟時蓋其遇也希祥勞臣之子才名自致迹涉便佞貞介所羞元饒始終任遇無虧公道名位自卒其始優乎子高權重為戮亦其宜也華皎經編云始既踏元功殷憂之辰自同勁草雖致奔敗未足為非師知送往多闕見忌新主謀人之義可無慎哉然晚遇誅夷非其過也毛喜逢時遇主好謀而成見廢昏朝不致公輔惜矣沈陸所以見重固亦雅望之所致焉

列傳第五十八

南史六十八

列傳第五十九

南史六十九

李延壽

沈炯

虞荔弟寄

傅

章華

顧野王蕭齊

姚察

沈炯字初明吳興武康人也祖瑀梁尋陽太守父續王府記室參軍炯少有雋才為當時所重仕梁為尚書左戶侍郎吳令侯景之難吳郡太守袁君正入授建鄴以炯監郡臺城陷景將宋子仙據吳興使召炯方委以書記炯辭以疾子仙怒命斬之炯解衣將就戮礙於路間桑樹乃更牽往他所或救之僅而獲免子仙愛其才終逼之令掌書記

及子仙敗王僧辯素聞其名軍中購得之酬所獲者錢十萬自是羽檄軍書皆出於炯及簡文遇害四方岳牧上表勸進僧辯今炯制表當時莫有逮者陳武帝南下與僧辯會白茅濟登壇設盟炯為其文及景東奔至吳郡獲炯妻虞氏及子行簡並殺之炯弟攜其母逃免侯景平梁元帝愍其妻子嬰戮特封原鄉侯僧辯為司徒以炯為從事中郎梁元帝徵為給事黃門侍郎領尚書左丞魏剋荊州被虜甚見禮遇授儀同三司以母在東怕思歸國恐以文才被留閉門却掃無所交接時有文章隨即棄毀不令流布嘗獨行經漢武通天臺為表奏之陳已思鄉之意曰臣聞

橋山雖捨鼎湖之靈龜可祠有魯遂荒大庭之跡無泯伏惟陛下降德猗蘭纂靈壺峇漢道既為神仙可望身之果於海浦禮日觀而稱功橫中流於汾河指栢梁而高宴何其甚樂豈不然歟既而運屬上僊道窮晏駕甲帳珠簾一朝零落茂陵玉盤遂出人間陵雲故基與原田而肺腑別風餘跡帶陵阜而芒芒羈旅縲臣豈不落淚肯承明見厭嚴助東歸駟馬可乘長卿西反恭聞故實竊有愚心黍稷非馨敢望傲福但雀臺之弔空愴魏君雍丘之祠未光夏后瞻仰煙霞伏增悽戀奏訖其夜夢有宮禁之所兵衛甚嚴炯便以情事陳訴聞有人言甚不惜放卿還幾時可至少

日便與王克等立獲東歸歷司農卿御史中丞陳武帝受禪加通直散騎常侍表求歸養詔不許文帝嗣位又表求去詔答曰當敕所由相迎尊累使卿公私無廢也初武帝嘗稱烟宜居王佐軍國大政多預謀謨文帝又重其才欲寵貴之會王琳入寇大雷留異擁據東境帝欲使烟因是立功乃解中丞加明威將軍遣還鄉里收徒眾以疾卒于吳中贈侍中謚恭子有集二十卷行於世

虞荔字披曾籍餘姚人也祖權梁廷尉卿永嘉太守父檢平北始興王諮議參軍荔幼聰敏有志操年九歲隨從伯闡候太常陸倕倕問五經十事荔對無遺失倕甚異之

又嘗詣徵士何胤時太守衡陽王亦造之胤言於王王欲見荔荔辭曰未有板刺無容拜謁王以荔有高尚之志雅相欽重還郡即辟為主簿荔又辭以年小不就及長美風儀博覽墳籍善屬文仕梁為西中郎法曹外兵參軍兼丹揚詔獄正梁武帝於城西置士林館荔乃制碑奏上帝命勒之于館仍用荔為士林學士尋為司文郎遷通直散騎侍郎兼中書舍人時左右之任多參權軸內外機務互有帶掌唯荔與顧協泊然靜退居于西省但以文史見知尋領大著作及侯景之亂荔率親屬入臺除鎮西諮議參軍如故臺城陷逃歸鄉里侯景平元帝徵為中書侍郎貞陽

候僭位授揚州別駕並不就張彪之據會稽蒯時在焉及文帝平彪武帝及文帝並書招之迫切不得已乃應命至都而武帝崩文帝嗣位除太子中庶子仍侍太子讀尋領大著作初蒯母隨蒯入臺卒於臺內尋而城陷情禮不申由是終身蔬食布衣不聽音樂雖任遇隆重而居止儉素淡然無營文帝深器之常引左右朝夕顧訪蒯性沈密少言論凡所獻替莫有見其際者第二弟寄寓于閩中依陳寶應蒯每言之輒流涕文帝哀而謂曰我亦有弟在遠此情甚切他人豈知乃敕寶應求寄寶應終不遣蒯因以感疾帝欲數往臨視令將家口入省蒯以禁中非私居之所

乞停城外帝不許乃令住蘭臺乘輿再臨問手敕中使相望於道又以蔬食積久非羸疾所堪乃敕曰卿年事已多氣力稍減方欲杖委良須克壯今給御魚肉不得固從所執蒯終不從卒贈侍中謚曰德子及喪柩還鄉里上親出臨送當時榮之子世基世南並少知名

寄字次安少聰敏年數歲客有造其父遇寄於門嘲曰郎子姓虞必當無智寄應聲曰文字不辨豈得非愚客大慙入謂其父此子非常人文舉之對不是過也及長好學善屬文性沈靜有栖遁志弱冠舉秀才對策高第起家梁宣城王國左常侍大同中嘗驟兩殿前往往有雜色寶珠梁

武觀之甚有喜色寄因上瑞兩頌帝謂寄兄荔曰此頌典
裁清拔卿之士龍也將如何擢用寄聞之歎曰美盛德之
形容以申擊壤之情耳吾豈實名求仕者乎乃閉門稱疾
唯以書籍自娛岳陽王粲為會稽太守寄為中記室領郡
五官掾在職簡略煩苛務存大體曹局之內終日寂然侯
景之亂寄隨兄荔入臺及城陷遁還鄉里張彪往臨川強
寄俱行寄與彪將鄭瑋同舟而載瑋嘗忤彪意乃劫寄奔
晉安時陳寶應據有閩中得寄甚喜陳武帝平侯景寄勸
令自結寶應從之乃遣使歸誠承聖元年除中書侍郎寶
應愛其才託以道阻不遣每欲引寄為僚屬委以文翰寄

固辭獲免及寶應結昏留異潛有逆謀寄微知其意言說
之際每陳逆順之理微以諷諫寶應輒引說他事以拒之
又嘗令左右讀漢書卧而聽之至蒯通說韓信曰相君之
背貴不可言寶應蹶然起曰可謂智士寄正色曰覆鄴驕
韓未足稱智豈若班彪王命識所歸乎寄知寶應不可諫
慮禍及己乃為居士服以拒絕之常居東山寺偽稱脚疾
不復起寶應以為假託遣人燒寄所卧屋寄安卧不動親
近將扶寄出寄曰吾命有所懸避欲安往所縱火者旋自
救之寶應自此方信之及留異稱兵寶應資其部曲寄乃
因書極諫曰東山居士虞寄致書於明將軍使君節下寄

流離艱故飄寓貴鄉將軍待以上賓之禮申以國士之眷
意氣所感何日忘之而寄沈痼彌留惕陰將盡常恐卒填
溝壑消塵莫報是以敢布腹心冒陳丹款願將軍留須臾
之慮少思察之則冥目之日所懷畢矣夫安危之兆禍福
之機匪獨天時亦由人事失之毫釐差以千里是以明智
之士據重位而不傾執大節而不失豈惑於浮辭哉將軍
文武兼資英威動俗往因多難杖劔興師授旗誓衆抗威
千里豈不以四郊多壘共謀王室臣時報主寧國庇人乎
此所以五尺童子皆願荷戟而隨將軍者也及高祖武皇
帝肇基草昧初濟艱難于時天下沸騰人無定主豺狼當

道鯨鯢橫擊海內業業未知所從將軍運動微之鑒從折
衝之辯策名委質自託宗盟此將軍妙算遠圖發於衷誠
者也及主上繼業欽明睿聖選賢與能羣臣輯睦結將軍
以維城之重崇將軍以裂土之封豈非宏謨廟略推赤心
於物者也屢申明詔款篤殷勤君臣之分定矣骨肉之恩
深矣不意將軍惑於邪說翻然異計寄所以疾首痛心泣
盡繼之以血萬全之策竊為將軍惜之寄雖疾侵毫及言
無足采千慮一得請陳愚筭願將軍少戢雷霆賒其畧刻
使得盡狂瞽之說披肝膽之誠則雖死之日猶生之年也
自天厭梁德多難荐臻寰宇分崩英雄互起不可勝紀人

人自以為得之然夷凶翦亂拯溺扶危四海樂推三靈眷
命揖讓而居南面者陳氏也豈非歷數有在惟天所授當
璧應運其事甚明一也主上承基明德遠被天網再張地
維重紐夫以王琳之強侯瑱之力進足以搖蕩中原爭衡
天下退足以屈強江外雄張偏隅然或命一旅之師或資
一士之說琳即瓦解冰泮投身異域瑱則斫角稽顙委命
闕庭斯又天假之威而除其患其事甚明二也今將軍以
藩戚之重擁東南之衆盡忠奉上勩力勤王豈不勲高竇
勳寵過吳芮析珪判野南面稱孤其事甚明三也且聖朝
棄瑕忘過寬厚得人改過自新咸加叙擢至如余孝頃潘

純隄李孝欽歐陽頤等悉委以心腹任以爪牙曾中豁然
曾無纖芥况將軍豐菲張繡罪異畢謀當何慮於危亡何
失於官里貴此又其事甚明四也方今周齊鄰睦境外無虞
并兵一向匪朝伊夕非有劉項競逐之機楚趙連從之事可
得雍容高拱坐論西伯其事甚明五也且留將軍狼狽一
隅亟經摧衄聲實虧喪膽氣衰沮高瓌向文政留瑜黃子
玉此數人者將軍所知首鼠兩端唯利是視其餘將帥亦
可見矣孰能被堅執銳長驅深入擊馬埋輪奮不顧命以
先士卒者乎此又其事甚明六也且將軍之強孰如侯景
將軍之衆孰如王琳武皇威候景於前今上摧王琳於後

此乃天時非復人力且兵革已後人皆厭亂其孰能棄墳墓捐妻子出萬死不顧之計從將軍於白刃之間乎此又其事甚明七也歷觀前古鑒之往事子陽季孟傾覆相尋餘善右渠危亡繼及天命可畏山川難恃况將軍欲以數郡之地當天下之兵以諸侯之資拒天子之命強弱逆順可得侔乎此又其事甚明八也且非我族類其心必異不愛其親豈能及物留將軍身縻國爵子尚玉姬猶其棄天屬而弗顧背明君而孤立危急之日豈能同憂共患不背將軍者乎至於師老力屈懼誅利賞必有韓智晉陽之謀張陳井陘之事此又其事甚明九也且北軍萬里遠關鋒

不可當將軍自戢其地人多顧後梁安背向為心宵旰匹夫之力衆寡不敵將帥不侔師以無名而出事以無機而動以此稱兵未知其利以漢朝吳楚晉室穎顯連城數十長戟百萬拔本塞源自圖家國其有成功者乎又其事甚明十也為將軍計者莫若不遠而復絕親留氏秦郎快郎隨遣入質釋甲偃兵一遵詔旨且朝廷許以鐵券之要申以白馬之盟朕不食言誓之宗社寄聞明者覽未形智者不再計此成敗之効將軍勿疑吉凶之幾間不容髮方今蕃維尚少皇子幼冲凡預宗族皆蒙寵樹况以將軍之地將軍之才將軍之名將軍之勢而能克修蕃服北面稱臣

寧與劉澤同年而語其功業哉豈不身與山河等安名與
金石相獎願加三思慮之無忽寄氣力絲微餘陰無幾感
恩懷德不覺狂言鈇鉞之誅甘之如蔗寶應覽書大怒或
謂寶應曰虞公病篤言多錯謬寶應乃小釋亦以寄人望
且容之及寶應敗走夜至蒲田顧謂其子扞秦曰早從虞
公計不至今日扞秦但泣而已寶應既禽凡諸賓客微有
交涉者皆誅唯寄以先識免禍初沙門慧標涉獵有才思
及寶應起兵作五言詩以送之曰送馬猶臨水離旗稍引
風好看今夜月當照紫微宮寶應得之甚悅慧標以示寄
寄一覽便止正色無言慧標退寄謂所親曰標公既以此

始必以此終後竟坐是誅文帝尋敕都督章昭達發遣寄
還朝及至謂曰管寧無恙甚慰勞懷頃之帝謂到仲舉曰
衡陽王既出閣須得一人旦夕游處兼掌書記宜求宿士
有行業者仲舉未知所對帝曰吾自得之乃手敕用寄寄
入謝帝曰所以暫屈卿游蕃非止以文翰相煩乃令以師
表相事也後除東中郎建安王諮議加戎昭將軍寄乃辭
以疾不堪旦夕陪列王於是令長停公事其有疑議就以
決之但朔旦牋修而已太建八年加太中大夫後卒寄少
篤行造次必於仁厚雖僮豎未嘗加以聲色至臨危執節
則辭氣凜然白刃不憚也自流寓南土與兄荔隔絕因感

南史列傳五十九
九
氣病每得荔書氣輒奔劇危殆者數矣前後所居官未嘗
至秩滿裁暮月使自求解退嘗曰知足不辱吾知足矣及
謝病私庭每諸王為州將下東必造門致禮命釋鞭板以
几杖侍坐嘗出游近寺閭里傳相告語老幼羅列望拜道
左或言誓為約者但指寄便不欺其至行所感如此所制
文筆遭亂並多散失

傅縡字宜事北地靈州人也父彞梁臨沂令縡幼聰敏七
歲誦古詩賦至十餘萬言長好學能屬文太清末丁母憂
在兵亂中居喪盡禮哀毀骨立士友以此稱之後依湘州
刺蕭循循頗好士廣集墳籍縡肆志尋閱因博通羣書王

琳聞其名引為府記室琳敗隨琳將孫瑒還都時陳文帝
使顏晃賜瑒雜物瑒託縡啓謝詞理周洽文無加點晃還
言之文帝召為撰史學士再遷驃騎安成王中記室撰史
如故縡篤信佛教從興皇等慧朗法師受三論盡通其學
尋以本官兼通直散騎侍郎使齊還累遷太子庶子後主
即位遷祕書監右衛將軍兼中書通事舍人掌詔誥縡為
文典麗性又敏速雖軍國大事下筆輒成未嘗起草沈思
者亦無以加甚為後主所重然性木強不持檢操負才使
氣陵侮人物朝士多銜之會施文慶沈客卿以佞見幸專
制衡軸而縡益踈文慶等因共譖之後主收縡下獄縡素

剛因憤恚於獄中上書曰夫人君者恭事上帝子愛黔黎
省嗜慾遠諂佞未明求衣日盱忘食是以澤被區宇慶流
子孫陛下頃來酒色過度不虔郊廟大神專媚淫昏之鬼
小人在側宦豎弄權惡忠直若仇讎視百姓如草芥後宮
曳綺繡厩馬餘菽粟北庶流離轉尸蔽野貨賄公行帑藏
損耗神怒人怨眾叛親離恐東南王氣自斯而盡書奏後
主大怒頃之稍解使謂曰我欲赦卿卿能改過不繹對曰
臣心如面臣面可改則臣心可改後主於是益怒令宦者
李善度窮其事賜死獄中有集十卷繹雖強直有才而毒
惡傲慢為當世所疾及死有惡蛇屈尾來上靈牀當前受

祭酹去而復來者百餘日時時有彈指聲時有吳興童華
字仲宗家本農夫至華獨好學與士君子游處頗通經史
善屬文侯景之亂游嶺南居羅浮山寺專精習業歐陽頔
為廣州刺史署為南海太守頔子統敗乃還都後主時除
太帝令非其所好乃辭以疾頔明初上書極諫其大略曰
陛下即位于今五年不思先帝之艱難不知天命之可畏
溺於嬖寵惑於酒色祠七廟而不出拜妃嬪而臨軒老臣
宿將棄之草莽諂佞讒邪升之朝廷今壇場日廢隋軍墜
境陛下如不改絃易張臣見麋鹿復游於姑蘇臺書奏後
主大怒即日斬之

顧野王字希馮吳郡吳人也祖子喬梁東中武陵王府參
軍事父烜信威臨賀王記室兼本郡五官掾以儒術知名
野王幼好學七歲讀五經略知大指九歲能屬文嘗制日
賦領軍朱异見而奇之十二隨父之建安撰建安地記二
篇長而徧觀經史精記嘿識天文地理著龜占候蟲篆奇
字無所不通為臨賀王府記室宣城王為揚州刺史野王
及琅邪王褒並為賓客王甚愛其才野王又善丹青王於
東府起齋令野王畫古賢命王褒畫賢時人稱為二絕及
侯景之亂野王丁父憂歸本郡乃召募鄉黨隨義軍援都
野王體素清羸裁長六尺又居喪過毀殆不勝衣及杖戈

被甲陳老臣之義逆順之理抗辭作色見者莫不壯之城
陷逃會稽陳天嘉中敕補撰史學士大建中為太子率更
令尋領大著作掌國史知梁史事後為黃門侍郎光祿卿
知五禮事兼贈祕書監右衛將軍野王少以篤學至性知
名在物無過辭失色觀其容貌似不能言其厲精力行皆
人所莫及所撰玉篇三十卷輿地志三十卷符瑞圖十卷
顧氏譜傳十卷外野樞要一卷續洞冥記一卷玄象表一
卷並行於時又撰通史要略一百卷國史紀傳二百卷未
就而卒有文集二十卷時有蕭濟字孝康東海蘭陵人也
好學博通經史上梁為太子舍人侯景封松陽縣

侯陳文帝為會稽太守以濟為宣毅府長史及即位授侍
中太建中歷位五兵度支祠部三尚書卒

姚察字伯審吳興武康人吳太常卿信之九世孫也父僧
坦梁太醫正及元帝在荊州為晉安王諮議參軍後入周
位遇甚重察幼有至性六歲誦書萬餘言不好戲弄勵精
學業十歲能屬文僧坦精醫術知名梁代二宮所得供賜
皆回給察兄弟為游學之資察並用聚蓄圖書由是聞見
日博年十二梁簡文帝時在東宮盛修文義即引於宣猷
堂聽講論難為儒者所稱及簡文嗣位九加禮接起家南
海王國左常侍兼司文侍郎後兼尚書駕部郎遇梁室喪

亂隨二親還鄉里在亂離間篤學不廢元帝於荊州即位
授察原鄉令後為佐著作撰史陳永定中吏部尚書徐陵
領大著作復引為史佐太建初補宣明殿學士尋為通直
散騎常侍報聘于周江左者舊先在關右者咸相傾慕沛
國劉臻竊於公館訪漢書疑事十餘條並為剖析皆有經
據臻謂所親曰名下定無虛士著西聘道里記使還補東
宮學士遷尚書祠部侍郎舊魏王肅奏祀天地設宮懸之
樂八佾之儻爾後因循不革至梁武帝以為事人禮緣事
神禮簡古無宮懸之文陳初承用莫有損益宣帝欲設備
樂付有司立議以梁武為非時碩學名儒朝端在位咸希

音注同察乃博引經籍獨違羣議據梁樂為是當時驚駭莫不慙服僕射徐陵因改同察議其不順時隨俗皆此類也後歷仁威淮南王平南建安王一府諮議參軍丁內憂去職俄起為戎昭將軍知撰梁史後主立兼東宮通事舍人知撰史至德元年除中書侍郎轉太子僕餘並如故初梁室淪沒察父僧坦入長安察蔬食布衣不聽音樂至是凶問因聘使到江南時察母韋氏喪制適除後主以察羸瘠慮加毀頓乃密遣中書舍人司馬申就宅發哀仍敕申專加譬抑尋以忠毅將軍起兼東宮通事舍人察頻讓不許俄敕知著作郎事服闋除給事黃門侍郎領著作察既

累居憂戚齋素日久因加氣疾後主嘗別召見為之動容命停長齋令從晚食又詔授祕書監領著作奏撰中書表集歷度支吏部二尚書察自居顯要一不交通嘗有私門生不敢厚餉送南布一端花練一匹察謂曰吾所衣著止是麻布蒲練此物於吾無用既欲相款接幸不煩爾此人遂請察厲色驅出自是莫敢饋遺陳亡入隋詔授祕書丞別敕成梁陳二史又敕於朱華閣長參文帝知察蔬菲別日獨召入內殿賜果菜指謂朝臣曰聞姚察學行當今無比我平陳唯得此一人開皇十三年襲封北絳郡公察在陳時聘周因得與父僧坦相見將別之際絕而復蘇至是

承襲愈更悲感見者莫不爲之歔歔丁後母杜氏喪解職
在服制之中有白鳩巢于戶上仁壽二年詔除負外散騎
常侍晉王侍讀煬帝即位授太子內舍人及改易衣冠刪
定朝式預參對問大業二年終于東都遺命薄葬以松板
薄棺纔可容身土周於棺而已葬日止鹿車即送厝舊塋
北不須立靈置一小牀每日設清水六齋日設齋食菜果
任家有無不須別經營也初察欲讀一藏經並已究竟將
終曾無痛惱但西向坐正念云一切空寂其後身體柔軟
顏色如恒兩宮悼惜贈賻甚厚察至孝有人偷鑿識沖虛
謙遜不以所長矜人專志著書白首不倦所著漢書訓纂

三十卷說林十卷西聘王璽建康三鍾等記各一卷文集
二十卷所撰梁陳史雖未卑功隋開皇中文帝遣中書舍
人虞世基索本且進臨亡戒子思廉撰續思廉在陳爲衡
陽王府法曹參軍會稽王主簿

論曰沈炯才思之美足以繼踵前良然仕於梁朝年已知
命主非不文而位裁邑宰及於運逢交喪驅馳戎馬所在
稱美用捨信有時焉虞荔弟兄才行兼著崎嶇喪亂保茲
貞一並取貴時主豈虛得乎傳緯聰警特達才氣自負行
之平日其猶殆諸處以危邦死其宜矣顧姚桐託藝文蹈
履清直文質彬彬各踐通賢之域美矣乎

列傳第五十九

南史六十九



